



PL

Tarhan, Abdülhak Hâmit

248

Sardanapal

T396S37

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

1229

18/707





Tarhan, Abdülhak Nâmit



کتابخانه  
مجلس شورای ملی

کلیات آثار:  
Sārdānāpāl

سارداناپال

- بر فاجعه تاریخیه -


استانبول — مطبعة عامره

۱۳۳۵

PL  
248  
T396 S37

۹

بر هیئت مخصوصه طرفندن طبع ابتدا یراشدر .



انجام و زرقی جمعیت مخبره سنه تقدیر اهرام .

ع ۰ ع ۰

---

یونین قرق سنه اول یازمیش و ۱۹۱۵ سنه سنده تعدیل و تجدید اولمیشدر .

## مقدمه

سارداناپال تاریخ مسیحیدن سکز عصر اول دنیایه  
نگامش بر آثوریا حکمداری در. صدمات ازمنه ایله شخص  
مغویسی بوگون مرهبه خیالیتی بوله رق، تاریخی ده  
افسانه لردن مثال اولمشدر.

سارداناپال نامه بوندن اون بر سنه مقدم یازدیغم  
بواثر، ابعاد مظلمه شکوک ایچنده قالان بروقه تاریخیه نك،  
ناثره عشق ایله تنویر اوله رق گوسترلمسی در که مشمول  
نظرلری اوله حق ارباب دقت بونده تاریخه مطابقتدن زیاده  
بر شعر وانشا هوسنك الجا آتنه موافقت بولور لر.

اثرك تاریخچه اولان نقائص وزوائدینی بوسوز ایله  
اعتراف ایتمش اولدقدن صکره، ( بروقه تاریخیه نی  
حسیات شاعرانه یه توفیق ایچون تغیر ایتمکدن ایسه،  
اوحسیاته گوره بر فاجعه خیالیه تصویر ایتمک اولی دگلمی در؟ )  
یولنده وارد اوله حق سؤاله جواب اوله رق، دیرم که :

— وقوعات عالمی دائما قلبلرنده حس ایدرجه سنه  
شاعر یارادلمش اولان ارباب قدرت ایچون، بر شی



يازماق ايستدكلرى زمان ، توارىخ قديمه دن استمداده  
 احتياج يوغيسه ده ، بن يازديغم شيئك موضوعنى تاريخدن  
 آلمق ضرورتنده بولنان عجزه دنم .

اساسى بوجيهله تدارك ايدوب ، صكره آنى كندى  
 افكارمه گوره وضع ايتمك عادتدركه تزر ، اشبه ،  
 طررق ، هب بو يولده يازلمش شيلر اولديغى گي ،  
 سارداناپال ده اويله در .

سارداناپالى يازديغم زمان استاد محترمىز عطوفتلو كال  
 بك افدى حضرتلرينه خبر و ير مش اولديغى دنم ، كنديلرى  
 جواباً (لورد بايرون) ك ، فرانسه زجه يه مترجم ، بونامده  
 بر اثرى بولنديغى اخطاراياله مطالعه سنى توصيه بيور مشلر  
 ايدى . او قودم ، تطبيق ايتمم . بايرونك يازديغى بالطبع  
 گوزل ، بىم يازديغى فنا ، فقط بىستون بشقه بوندم .  
 ارباب مطالعه دن بوايكى اثرى تطبيق بيورمق ايستينلر  
 دخی ، ظن ايدرم كه ، ديدىگم عدم مطابقى تصديق ايدرلر .  
 سارداناپال ك ادبياتجه اولان نقيصه لرينه گلنجه : باشليجاسى  
 اشبه ايله تزر گي بونك ده قوائى مقيده ايله يازلمش  
 اولمى دركه اثرى شرط اول آتار اولان طبعيلكدن

چقار یور . اجبار طبیعتله اختیار اولمش بر طرز افاده یه  
مستند اولورسه اك طبیعی حسیاتك بيله طبیعتی محو اولور .  
برهیکل نه قدر گوزل اولورسه اولسون ، روح سزدره  
حالبوکه برهیکلکده گوزللیگی طبیعتیه اولان مقارنتی  
نسبتنده در .

ادر نهك برکوشه سنده یگر می بش گون ازوا ایدوبده  
یازدیغمی دوشونهك نشرینه مجبور اولدیغم بو اتردن هیچ  
بر مطالعك ذوقیاب اوله میه جغنی بیلیرم . یالکیز گوکل  
ایسترکه بوقافیه مقیده قصوری ، کتابك سائر خطالرینی هم  
اثبات ، هم ده محو ایدر بر قصور عد اولنه !..

بو تضرعدن ارباب مطالعه ایچنده ، ایچنده کی فنای  
مدهش عظیمی دوشونموبده بر قبرك طاشنده کی سوزلرده  
نقیصه جوی اولانلر [\*] « سارداناپال بویولده مقفی اولماسه  
خطادن منزّه بولوردی . » معناسنی استخراجده مختاردرلر .  
بن اخوانمه سویلرم که ، انسان مخطی اولدیغندن اثری  
خطاسمز اولق ممکن دگل در . فقط بر مؤلف خطا  
ایتماش اولمغی تمنی ایتمکه ، یاخود ایتدیکی خطایه بر سبب

[\*] ( مقبر ) انتشار ایتدیکی زمان ، اسمندن محتویاتنه قدر  
دوچار طعن و تعریض اولمشدی . واك چوق دخل ایدنلرده معلم  
تاجی افندی ایله صلاحی بك ایدیلر .

حاشیه طابع

گوستر مکه موأخذہ دعوت ایتش اولماز . شوراسی ده علاوه  
اوله جق شیردندرکه زما نمرده و تخصیصاً سایه معارف وایه  
حضرت پادشاهیده اقسام معرفتک جمله سی مظهر ترقیات  
اوله رف ، بوندن ادبیاتمز کمالیه حصه دار بولنش و او ترقی  
ادیدن مؤلف حقیرده بر حصه دوشدیکي ، توجهلریله  
مفتخر بولندیغ ادبای عثمانیه نزدنده قبول بیورلمش ایسه ده  
ساردانایال بو دور ترقیدن اول یازلمش بر اثر اولدینی  
ایچون محتوی بولدینی اشعار و افکارک ترقیات عصریه  
ایله بر مناسبتی اوله میه جفی طبعی در .

الحاصل ساردانایال قوافی مقیده ایله یازلماش اولسه  
خطالری شمديکنه نسبتله قلیل و خصوصیه اولجه یازلمش  
اولمایوبده ، عصر معالیه صر جناب شهریاریده قلمه  
آلمش بولنسه ترقیات حاضره ادبیه دن بشقه مسببی  
اولیه جق بر درجه ترقی ابرازیله ترقیات حاضره ادبیه مزه  
اثر عاجزانه مده بر دلیل اوله بیلیردی دیمک ایسترم . بورالریخی  
یازیشم نه اعتذار ، نه مواضعه ، نه ده آتیده اوله جق  
موأخذہ لره مدافعه ایچون اولیوب ، مقصد یالکتر ارباب  
مطالعه یه بیان مطالعه در .

عبدالمجید

لوندره ۲۰ ۰ خیزران ۱۳۰۳

## اشخاص

|   |   |
|---|---|
| ساردانا پال   | آئوريا حكمدارى                                |
| يودث  | ساردانا پال كزى                               |
| بليس  | اختلال رؤساندن بابل واليسى                    |
| آربا كس   | كذلك اختلال سرآمدانندن مديا واليسى            |
| آقين دارا كس  | بليسك حفيدى ويودنك عاشق معشوقى                |
| عبد البعل   | اختلال ليلارك رئيس عسكريسى ويودنك عاشق منفورى |
| ساشان   | رئيس الكهنه ، ام النجوم .                     |
| نيناس   | آقين دارا كسك حرب ارقداشى ضابطادن             |
| ميروز   | عليه دار استبداد برصنديد                      |
| <p>سباد ، هراستستناس ، زفير ، آستراس ؛ صناديد حكومت .<br/> سميرامس ، باقر يانامس ، سوريبت ، يودنك معيت قادينلرى ،<br/> براختيار قادين ، باش خادم ، سذبوت ، خدمه ، جوارى ، عسكر ،<br/> خلق ، كهنه ، رهاين ، سازنده وخواننده ورقاصه قزلر ،<br/> مستقرش لر ، اصنام و هياكل ، پرى قزلرى ، حيوانات مقدسه ،<br/> وساردانا پال ك جوجو قلى وسراى قادينلرى .</p> |   |

منظر :

۱

بابل . دائره حكومت . براوطه . بلیس . آریا کس . آقین دارا کس .

بلیس

مصائب ، بلایا ، مظلّم یتر ؛  
یوق اولسون اوغدار ، او ظالم یتر ! ..

آریا کس

اوتوز بر ییل اولمش که حکمی روان ! ..

بلیس

تحمّله پیر وجوان ناتوان ! ..

آریا کس

همان قصدی مظلوم اولان جانهدر ،

بلیس

هب افعالی صاحب خرو جانهدر ! ..



## آربا کس

هنر کسترانله وطن پروران ،  
نبرد آزمایانله دانشوران ،  
اذادن ، جزادن بوگالمش بوم ،  
ایدر ترك دنیا ومیل عدم ..!

## بلیس

نه ملکه مدد رس ، نه خلقه معین ؛  
بوگون بلکه خلاقه دشمن لعین ..!

## آربا کس

سورولسون اومبرم بلای وطن ..!

## بلیس

برازده اوچکسون جلای وطن ..!  
آقین دارا کس کولر .

## بلیس

- بلوس - نامه سویلرم که یتر ؛  
اگر صاغ قالورسه بو هیئت بیتر ..!

## آر با کس

یارین چیقمه دن بر عمومی نفاق ،  
ایدلسون بوگون دفعنه اتفاق !..

بلیس

مدارج نو زردان علم نجوم  
اولور لر بزمه شریک هجوم .  
اویونجه بزم کاهنان نا گهان ،  
اویار کاهنانه مهان و کهان ،  
اولور خلق ایله کارمز مشترک ؛  
ینه بونده لکن جسارت گرک .

آقین ینه کولر

بزمه یعنی خلق ایتمهده اقتدا ؛  
صعوبت نمودار اولور ابتدا ؛  
اوبد بخته طایمقده در لشکری ،  
که اولمشدر آمالنک چا کری .  
بیوک اولدیغیچون بزم عزمزم ،  
بیوک اولمق ایجاب ایدر رزمزم .  
اوغل اونده در ، بزده وارسه پد ؛  
بوصورتله چارپشلق ایجاب ایدر .

او مرقاته مطلوب اولان ارتقا  
 بوگون لاشه ییغمقده در مطلقا .  
 اولور هر یوک ایش عسیر الحصول ،  
 او ایشده ثبات ایلکدر اصول .  
 نه ایشلر سه تقلیدی بالاعتیاد ،  
 صنایده ایلر عوام انقیاد ،  
 اکابر دنز بونده مادام بز ،  
 ایدر سهك بومقصدده اقدام بز ،  
 ایدر سهك بوعهد عظیمه وفا ،  
 بتون زیر دستان ایدر اقتفا .  
 بلیسم که فرمانرو بایلم ،  
 عمومه مقابل بوگون مقبلم ،  
 اگر چه حقیقتده گلدانی یم ؛  
 بوملکک نگهدار بلدانی یم ؛  
 عربلر له گلدانیان هب بئم ،  
 شریعت بئم بونده ، مذهب بئم !..  
 آقین دارا کس جدیت متمسخرانه ایله

سزگمش دیمک قلب و وجدان خلق ؛  
 دیمک سزسگنر شمدی یزدان خلق !..

آقین دارا کسه برنظر غصه و پانه دن مکره آربا کسه دونه روك دوام ايله

بوگون سن که والیسی سڭ مدیانک ،

توابعله مملو دیمک هریانک ؛

نه دیر سین ؟ .. بوتکلیفه مغبر میسین ؟ ..

بوایشده بزمله برابر میسین ؟ ..

آربا کس

نه یولده نمر قابل اقتطاف ؟ ..

بلیس

نگاه تیقظه برانعطاف ،

شواقلیمی تنصیفه تشویق ایدر .

آربا کس

مناسبه کیم بونده تمویق ایدر .

فقط لوحگزده نه در مرتسم ؟ ..

بلیس

ایکی شخصه دولت اولور منقسم .

آربا کس

بولکن نه صورتله قابل اولور ؟ ..

بلیس

بگا تختگه ، یعنی ، بابل اولور ؛  
سکا نینوا اولسون حکومت یری .

آقین مزیف

که قالماز او حالده خصومت یری !!

آر با کس دوشوندکدن مکره

بلیس ، آفرین !! . مشترک تخت و تاج !!

آقین

که اوندن ایدر اتحاد امتیاج !!

آر با کس

اولور یکدگر اربا کسله بلیس !!

بلیس

ایکی تخت دولت ، فقط بر جلیس .

آقین دائما مزیف

ویا خود ایکی جالسه بر سر یر !!



آربا کس

ایکی کلک تدبیر ایچون بر صریر !!

بلیس

ایکی سیف تدبیر ایچون بر غلاف !!

ایکیمی بردن

ایکی تنده بر قلب بی اختلاف .

• مصافحه ایله اوپوشورلر • آقین دارا کس بی اختیار کولر . •

بلیس

آقین ، ای سن او غلم ، نه دیر سین بوکما ؟ ..

آقین دارا کس

بویغماده بوقمی غنیمت بکما ؟ ..

آربا کس

حکومت اولنجه بزه منتقل ،

سزه برولایت دوشر مستقل !!

آقین دارا کس

دیمک ایشله دم بن بیوک برگناه :

یودنله تزوج مقرر کن ، آه !! ...

بلیس

کشی حر اولونجه ، دگلدر روا  
بوصورته اولمق اسیر هوا .  
وطن خدمتيله مباھی ایکن ،  
نه لایق بوسودای وجدان شکن ؟ ..  
دوشون که وجود گده کی آب و گل ،  
وطندن دیمکدر ، هوادن دگل .  
اولورکن وطن پر غبار کدر ،  
تراب تنک طویمق ایجاب ایدر ! ..

اقین دارا کس دستبوسی به چالشه رق

وطن خدمتیچون بوسودای عشق  
دگل حائل ...

بلیس

اولدگمه شیدای عشق ،  
بوعرض محبت نه لایق بگا ؟ ..  
قزک گوکلی اولسون موافق سکا .  
بردن آریا کسه توجهله  
بوامره همان ابتدا ایتلی

آربا کس

قیام ایتمک اوزره ندا ایتلی .

بایس

بو خلقی صیانتدر افکارمن .

آربا کس

— بلوس — در بو ایشده مددکارمن .

بلیس

أوت ، خلقه امدادی قیلدق مرام .

آربا کس

ایدر خالق البته اول خلقی رام . [\*]

کیندرلر .



---

[\*] یاخود : او خلقی ایدر خالق البته رام .

منظر :

۲

شب مهتاب

## آقین دارا کس

الهی !.. بوطوفان ، بو آتش نه در ،  
که برخون ناحقه لب تشنه در ؟..  
پدر !.. بکرمستم بجن فکرتک  
که غمخیزت حامیسی در فترتک ؛  
که اثرنده قانلر نمودار ایدر ؛  
که طی ایتدیگی ارضی مردار ایدر ،  
ملک سودیگمدن او حسنامی در ؟..  
ملککار عجب اویله رعنامی در ؟..  
او معصومه دن احترازایت ، پدر !..  
که قلبنده - استارطا - آرام ایدر :  
او قلبی قیارسهن ، دوشر افسرک ،  
دوشر افسرکله برابر سرک !..

پدر!.. بیل که رمی ایتدیگ دانلر ،  
 بتم قلبی بر اوروشده دلر!..  
 اونلک وجهی ، اولدق پر و فشان ،  
 وطن سینه سنده اولور برلشان ؛  
 فقط قبری ، برزخم اولور دائمی!..  
 کز ندکن مکره  
 ایرشدیرمه پایانه تکریمی ؛  
 نه ممکندر ، ای پیر طفل اشتہار ،  
 بو فرتوت فکرکله طردبہار!..  
 اولورمی ، هیچ ، ای والد ذی کمال ،  
 شو مہتابی سوندیرمگہ احتمال ؟..  
 براز مکره  
 صاغنده ، صوانده ، جواری بزم ،  
 ایدر شمدی آنلرنده صحراہ عزم ؛  
 بویانده هوای جبال ریاض ،  
 اویانده صفای قسور ریاض ؛  
 همان ہرچیں بر گورل جلوه گاہ ،  
 گزئلر کمیزن شاہ تہاد . —  
 او آہوی شیرافکن ، شہسوار ،  
 جواری اینچونده برز راہوار ؛



عزیمت ایدر لر کہ مقصد شکار ؛  
 کہ بیکلر جہ صیاد اولور دلفکار .  
 یا صیاد باقی میسین ، ای پدر ،  
 کہ دنیا یی ایتکده سین دربدر ؟ ..  
 امینم کہ تبدیلنه دولتک ،  
 غرضدر مجرد سنک آلتک ! ..  
 اوبرنیش عقرب دیمک در ، فقط  
 اوررسن اولور اوز حیالک سقط ! ..  
 توقف و تفکرله  
 یودث ، اویله آرایش باغ و گوه ؛  
 یودث ، اویله مأنوس فروشگوه ؛  
 فقط جملہ دن گوردیگی احترام ،  
 پدر سایہ سنده بوفق مرام .  
 دوشرسہ<sup>۱</sup> - پدر - پادشاہ - از قضا ،  
 او سلطان دہ دوشمک ایدر اقتضا ! ..  
 تہیجہ  
 حقیقتدہ سم اولسہ دہ شربتک ،  
 بوگون ، ای محبت ، سنک نوبتک ! ..  
 کیلیمز درونمدہ کی اشتہا ؛  
 کیلیمکدہ ییم بلکہ بن ازدها ! ..

ینہ متفکر

اوبت عزم معبدہ ایلر گھی ،  
 اہالی اولور عزمنك آ گھی ؛  
 طلوع ایله نجہ اوقدسی وجود ،  
 ایدرلر صفا صف رکوع وسجود !..  
 قیلار برتبسملہ خلقہ نظر ،  
 کہ اونلر جہ ہر صبح اودر منتظر :  
 ظلام مظلومہ فریاد زن ،  
 اوکا قارشی اما گولر مردوزن !..

زندگدن صکرہ

قوی پنجدہ ناتوان بر یورک .  
 یا تخلص ایچون بن ندیا پسہم گرک ؟..  
 گوگل دای\* ہجران ایله محتضر ،  
 اطبا مریض و تداوی مضر !..  
 شفا اومدیغم کاسہ لبریزم ،  
 ہلاکم مقرر فقط ایچمہ سہم !..  
 سپر جانگذر ، قلعه جای ستیز ،  
 رہا آلتی صاندیغم ، تیرتیز !..

آرامدن صکرہ تخرئلہ

دارا کس !.. نه دير سين ، بو هجران نصل ؟..  
 او جانانه برلکده سيران نصل ؟..  
 نه دن بويله قالدک ملول و غريب ؟..  
 نيجولدي او ايام عاشق فريب ؟..  
 هاني هر سحر ، گون طلوع ايمه دن ،  
 سکا گون گي عرض ديدار ايدن ؟..  
 برابر هاني عالم ماهتاب ؟..  
 اوسير غرويه برابر شتاب ؟..  
 هاني آه !.. او حسن خيaban عشق ؟..  
 اومونس غزال بيaban عشق :..  
 بو طوفان حسرت قوپوب نا گهان ،  
 پري واري اولسونمي گوزدن نهان ؟..  
 گورن ديرکه ، سيل سرييع المرور :  
 گچر ، عودت ايمز زمان سرور .  
 آقین !.. يادماضي ايدرين ، نه دن ؟..  
 گليرمي ، صانيرسين فنايه گیدن ؟..  
 اوتور کوشه غمده عزلت کنان ؛..  
 نه ذکر جهان ايت ، نه فکر جنان !..

دوشونور ، آغلار ، تبدال وضعیت ايله پرنشئه قالدق ورق

خیالات قورمقدیم جانگذر ؟  
 بودت صاغ وین صاغ ، نه لازم حذر ؟ ..  
 نه در ، درد یوق ، فکر در مان نیچون ؟ ..  
 اولوم گلمه دن حس حرمان نیچون ؟ ..  
 شوده وار که ، بر ایشقه تعبیر ایله ،  
 اولور چاره هر کاره تدبیر ایله ،  
 قالنجه دکین فوتمه بر رفق ،  
 بکا فرض اولان بونده محو اولماق ! ..

براز صکره

بلیس بر حریص ، آربا کس بر حسود .  
 نه در باری بیلسه ک بو طغیانده سود .  
 ملک ملک القاید رمش خسار ؛  
 نه لائق اونک محوینه اجتسار ؟ ..  
 وکیل امور ، اولیای عظام ،  
 که هر شیئه اونلر ویرر بر نظام ؛  
 بوگون اتفاق ایله یوب گیتملی ،  
 اوبد بخته تعیین حد ایتلی .  
 بو صورت رهین اصابت ایکن ،  
 و سفک دما بر مصیبت ایکن ،

ایدوب خارج سوره نصب خیام ،  
 اوئی خلمه جائز می ایتمک قیام ؟ ..  
 نه دن - نینوا - صحرای جیحون اوله ؟ ..  
 قرا بین فترتله مشحون اوله ؟ ..  
 شوملکی اوتوز بر شه نشه تمام ،  
 بو حاله گتیر مشن ایدوب اهتمام .  
 - نینوس - وضع دولت قیلان برولی ،  
 که بوندن سکز یوز سنه اوّلی ؛  
 او شه دن قالان مسند سلطنت ،  
 ایدلمک نیچون مرکز شیطنت ؟ ..  
 بردن بره  
 یودتله بولوشمق ، بوخوش برقرار ؟ ..  
 وظیفه م سحر وقتی بوندن فرار ! ..  
 کیده چی صرهدده عبدالبعل ظهور ایتمکه لطیفه طرزنده .  
 قارا کلقدده بیلدم : امیرالعرب ! ..  
 عبدالبعل  
 یوزم چونکه پک روشنای طرب ! ..  
 آقین دارا کس  
 - بلوس - دن دیمک گلدی الهام جنک .



عبدالبعل

- آقین - دن یالازمی ایهام جنک ؟ ..

آقین دارا کس

مقرر گورونمکده ، ظنم ، سفر .

عبدالبعل

سفرله برابر ، خصوصا ، طفر ! ..

آقین دارا کس

غنیمته لکن آقین بی طرف .

عبدالبعل

یودثله قاوشمقده وار بر شرف .

آقین دارا کس تهیجه

یودثمی ؟ ... نه دن سنجه معلوم اونام ؟ ..

عبدالبعل

بنمچون او در ائگوزل اغتام .

آنین دارا کس

یودثله سنک وارمی یا الفتک ؟ ..

عبدالبعل

نه کلفت ، سؤاله اولان کلفتک !!..

آقین دارا کس

عجب پینمزده رقابتی وار ؟..

عبدالبعل

عجب سنده هپ بر محبتی وار ؟..

آقین دارا کس

فقط سودیگک هیچ عیارک دگل .

عبدالبعل

سنکده ، امینم ، اویارک دگل .

آقین دارا کس

بوچهره اونکله تنافرده در !!..

عبدالبعل

بوخواهش او یوزدن توافرده در !!..

آقین دارا کس

سیه چهره برزنجی موسفید .

عبدالبعل

اومهرودن البت اولور مستفید .

آقین دارا کس

وجودنده چرکی زهر دمار ،  
یاسیاب ایچنده ییقانسمومی مار ؟ ..

عبدالبعل

اونکله نیچون ایتیم اقرار ...  
که برلیله خوشتر گلیر اختران ! ..

آقین دارا کس

اوقلبا بکنا نامزددر بوگون ؛  
بوگوندن سزادر بن ایتسم دوگون ! ..

عبدالبعل

ایدرکن بوگون انتظار صفا ،  
اولورسین یارین زار زار جفا ! ..

آقین دارا کس

امل صاف وخالص اولورسه ، قدر ،  
تداییره ترفیق توفیق ایدر .

عبدالبعل

دعا بونده ، برعاشق مستمند ؛  
اجابتسه معشوقه در ، نازمند .

آقین دارا کس

گوگل حظّ ایدر و صلی امهال ایله ؛  
فقط بحث اولتماز بوجهال ایله !..

عبدالبعل

کیمه سایه زندر اونخل ظریف ،  
گوررسین حلول ایتسه فصل خریف !..

آقین دارا کس

حلول ایله مز دهره براویله فصل !..  
شفقندن اوزا قدر سگنا باغ وصل !..

عبدالبعل

بیوک سویله مه ، ای هیولای گل !..  
بیوک فکر ادبدور ، بیوک سوز دگل .

آقین دارا کس

ایکی قلب یکجس نه دن آریلور ؟..  
طبیعی ، بدنندن بدن آریلور .

عبدالبعل

بدن بنده قالسون همان ، سنده روح !..

آقین دارا کس

بدندن نه سود اولسه روحاً جروح ؟..

عبدالبعل

سن اول بونده برکوکب سرفراز ،  
گچرکن سکنا شعله ویرمش براز ؛  
فقط بنده ایلر غروب آفتاب !..

آقین دارا کس

اوکوکبده برلکده ایلر شتاب :  
اونک اوستنه نور عرفان گبی ،  
سنک اوستکه برق طوفان گبی !..

ایکیسی ده مخالف جهتلردن حدت و سرعتله کیدرلر .



## منظر:

۳

نبنوا جوارنده خرما آناجلانی ، اوزاقده بیابان ، اوتنه ده ، بریده صدمه  
تاریخ : ییقلهش آثاراعصار ، مقابر ، حجر ، یودث ، سمیرامس ، باقتری ،  
یانامس ، سوریبت ، جوازی .

## سوریبت خلوصکارانه

شو صحرای وحشی مردم فریب ،  
پر بلر گذرگاهی ، دشت غریب ؛  
که سودایه شدت ویرر وحشی ،  
— بزی رعشه ناک ایتسه ده دهشتی —  
سمادن گوزلدر ، دگزدن گوزل ؛  
دگلدن فقط ذاتگزدن گوزل .  
یودث مکدر کزینیر .

## باقتری یانامس

شونی صورمه ده وار فقط اضطرار :  
نه اولسه گرک موجب اغبرار ...  
یا آثوریان شاهنک دختری ،  
که فرق ریاده در اختری ،

بو یولده اولورسه ملول و حزین ،  
نه اولماز کنیزان خدمت گزین ؟..

### یودث

بوگون شاه اولوب ده نه بولمش پدر ؟..  
عمومی دگلمی سرور و کدر ؟..

مین کوب

بنم زیر پایمده افسر بسر ،  
نیجه پادشهر ، دفین سر بسر !..  
زماننده هب مالک بحر و بر ،  
بوگون تخت و تاجیله زیر وزیر !..  
شو صحرای غبرا ، شو سخن تراب ،  
ویرر حس ایدن قلبه براضطراب !..  
بوویرانه یه سن ده حیرتله باق !..  
نه معموره در ؟ چشم عبرتله باق !..  
شوتنها مقابرله شهر خراب ،  
گلستان بوم ، آشیان غراب ؛  
بوامواته مسکن جهان حدیم ؛  
خیالات ایله طولمش ارض قدیم ؛



زماننده مشهور دوران ایش ؟  
سمایه برارض همران ایش !..  
خندق کجی برطرفی کو ستر-رک ، صکره جه  
اوشهر بلندی مرور زمان  
و لئون بر بیوک مقبر ایش هان !..  
او اهرام ، کرسی ظل عدم ؟  
او آواز هدن بایقوش اور مقدمه دم !..  
وحوشه تحوّل ایله ساکنان ،  
فقای جهانندن شکایت کنان ،  
قیلوب لیل مظلومه اعلاّی ضوت ،  
ایدر سمع فانی به القای موت !..  
عدم کارباننده یاخود جرس ،  
اولور تاجدارانه پیغامرس !..  
بتون تاجدار اولسه لر اقربام ،  
هب اتباعه تاج ایتسه اکسا بابام ،  
مقرر در اولمق یارین در بدر !..  
صکره جه

بوگون شاه اولوب ده نه بولمش پدر ؟..  
یورر ، طولاشور .

باقتری یا نامس

نه در بيلم اخفاده اصرار گز ،  
که معلومزد در هب اصرار گز ؟ ..

یودث

دوشوڪ ، تازه برقز ، حدید و خشین ،  
اسیر جنون ، طاغده تنها نشین ؛  
دگل آشنا رزمه ده ، بزمه ده ،  
الی یرده حیوان گبی گزمه ده ؛  
صانیر سین بلا سیلنك قیصر اخی ،  
که طیر ناقلریله قازار طوپراخی ؛  
صالار ، حایقرر ، وحشی بی زبان ،  
قوقار هریانی عین غول بیان ؛  
پیشان و عریان ، ملوث ، سقط ؛  
زماننده غایتله حسنا فقط ! ..  
گوزل یوز ، گوزل گوز ، گوزل بر آغز ؛  
گوزلجه دوشوڪ ، اوپله برقز جغز ،  
بوصورتده تغیر ایدرسه قدر ،  
نه صورتده انسانه تاثیر ایدر ؟ ..

بمده تجنن ایدوب عن قریب ،  
اودرلو اولور حال وشکلم غریب !..

سوریبت

- بلیس - اوغلی بر بنده کزدر سزک ...  
او محتاج گلخنده کزدر سزک .

یودث

بوطوپراقده بیتیز او گلنخل تر ،  
بیتسه بنم آب ودانهم بیتر !..  
یازق !.. عمرم اولدی عذاب جحیم !..

سوریبت

اونی جنت ایتزمی بعل رحیم ؟..

یودث

یرم سجن مظلم ، یولم تنکنا ؛  
طورر سهم قنادر ، کیدر سهم فنا !..  
گزرکن ، طوررکن ، یادر خواب ایکن ،  
أولومدر بنم قوللرمدن چکن !..  
سریر حکومت بوگون مولدم ؛  
حکومت قیلان ذات ایسه والدم .

فقط جای آتی م او بیت الحزن  
 که باینده نفرین اولور حلقه زن !!  
 نه اولدم مالکزاده ایتشمسه بخت ؟  
 یارین عرش اعلا یه چیقماز که تخت !!  
 گهر در سریره منقش نقاط ،  
 بنم اعتقادجه صورسهن ، فقط  
 طور در چشم حقه او نقش نگار ،  
 دموع یتیمانه دن یادگار !!  
 ملک طوغدم اما ، اولور کن حقیر ؛  
 مطان اولیردم ، طوغیدم فقیر !!

سمیرامس

غنی دولت و ثروته گوز دیکن  
 گدالر میاننده محسود ایکن ؛  
 تحفدر که بعضاده بر شهریار  
 گدای غریبی صایار بختیار . -  
 مُتَوَجَّسه سودا ایله رأسکُز ؛  
 نه در سویله یلک باعث یأسکُز ؟  
 سزه کیم رقابتله بدنام اولور ؟  
 یا کیم منکر حسن اصنام اولور ؟

آتل دیسه اوق ، دونمز البت گری ؟ ..  
سزی کیم گوررده سه ور دیگر ی ؟ ..

یو دث

مؤثر دگلدر تمنی بیله .

سمیراهس

اولور امره تابع تآنی ایله .

سوریته دونه وک

کیدوب سویله ، گلسون شوسازنده لر ! ..

سوریلت کیدرکن لطیفه ایله

نیاز ایسته مز هیچ اونا زنده لر ! ..

سمیراهس

کدر ، ایتک ایسترسه کز اعتیاد ،

طرب مجلسنده بولور ازدیاد .

سه ور جمع اضدادی خلاق کون ؛

تلوتلی در همده اخلاق کون .

ایضمق گرک سرد و گرمه بشر ؛

بواضداده یعنی آاشمق دوشر .

بوگون گل ، یارین بر فلر سر پهرک ، [\*]  
مهتوس جهان کیفلمک گرک !..

سازنده و خواننده ورقاصه قزلر کلوب رقص ایله برابر آئیده کی  
منظومه او قوتور .

ساز ورقص

گوکلدن تر نیم ایدر کن نهانی ،  
گلیر رقصه دیده مده عکس جمالک .  
صومار سه م ، گلیر کرینه نا گهانی ،  
اولوب منعکس نغمه بی همالک .

سکوت ورقص

بری رقص ایدر اولسه بزم نغمده ،  
سنی ایسترم انده ساز گله دمساز .  
تمنای رقصکسه ، هنگام غمده ،  
تکرر قیلار نغمه ساز اولسه بر ساز .

ساز ورقص

تجرده جمعیتمدک ، بوگون شو  
بیابان قدر بی کس اول بزم زندان .  
سیه زلفه بند ایتدیگک عهده قارشو  
صحاری بی ایتدک بو مجنونه زندان !..

[\*] مصراع اولاک اصلی - کل و کرد و برف و شرر - سر پهرک .

ایدی . ایکنجی مصراعده ایسه - جهان - یرینه - بعل - دیکده .  
اولور که آثور بیلرک معبودیدر .

## ساردانا بال

سكوت ورقص

بو حالم نه ، صور مزيسين هيچ آ ظالم ! ..  
ني خا كسار ايتدي طوفان حسرت ! ..  
ينه صورمه ، او گر نه ، زيرا بو حالم ،  
گور رسه ن اولور سنجه بادي ن فرت ! ..  
ساز ورقص

يودث هيئت مغنيه ي اسكات ايله

صوسوك ! .. اكلاشلدي غرض عاقبت .  
كيرن سوريته

بنچونمي ياپدك بوني ، سوريته ؟ ..  
صفاياب اوله آلدېغ نشئ دن ،  
بو طوطيلري كيمسه گويا ايدن ! ..  
كيزلي بكا ايدو .

سوريته

دوشورمش يره بر گوگرچين دمين ،  
بوده بلكه بر نغمه نوزمين .

آلنده بر ياپراقله كولر لك تقرب ايتديكي يودث ياپراق آلوب اوقويه وق [\*]

» مساعدي بيلم بو كا احترام :

[\*] اوتار يحدده كاغد يرينه ياپراق استعمال اولنديني كبي  
خطوطده بر طاقم اشكالدن عبارت ايدى .

سز گله براز حسب حال ایسترم .  
« درا کس »

یودث متبیج

ظهورات نا گه ظهور !..

کمزینه رک

غریب انقلاب سنین و شهر !..

قزله

یانمده اولانلر چکلسون همان .

سوریدت کوله رک

یا محروم ایدلمک نیچون محرمان ؟..  
گچیرمک ایچونمی دم و صلتی  
کبو تر دمانه ؟..

یودث

گوکل علی !..

هرکس کیدر . یودثله سمیرامس قانور .

سمیرامس

تلاشی فقط ترک ایدک ابتدا .



## یودث

نه لازم بو تعیین مسلك ؟..

آغا چرك ايجنده واوا قده آقین دارا کمی کورمه سیله

خدا !..

برشجره انکا ایدر و بر اشارتله سدرامسی ده کوندورده

آقین دارا کس کلیرکن

بیاض البسه یله نه خوش بر خیال :..

تقریله

سحر وقتی بر یادگار لیل !..

بوسیتون یا فلاشدن مکره

یودث !.. سمنی سین گوردیگم معجزه ؟..

اولوب ظاهر ، اظهار قیل عاجزه !..

یودث منفعل

آقین !.. بن خلوص وریا ایسته مم !..

گونشسه نه سندن ضیا ایسته مم !..

کیتدیجه یوموشاق

سنی ایسترم سندن انحق بوگون !..

مصافحه ایله

دیلسه ن حیا ایت ، دیلرسه ن اوگون !..

آقینی بر طرفه افتاد ایله

اوتور !..

سدکې برطرفه او طور لر .

سن گوگرچین ، بوموقع کمین .

آقین دارا کس

کینلر بتون بویله اولسه امین !..

یودث

بکایسه گلستانلر اولدی قفس ؛

صباحك دم اولی صوڭ نفس .

حزین شی !..

آقین دارا کس

فقط آغلایورسین ؟..

یودث کربه ایله

حایر !..

نه ممکن بو ، خندان ایکن طاغ ، بایر ؟..

گولرکن شوآنده بتون کائنات ؛

بن آغلارمی یم ؟..

آقین دارا کس

یودثک یوزینه تعمیق نگاه ایله

مطلع بینات !..

یودث

دارا کس !.. فرار ایتسهك اولمازمی بز؟..  
بوگون چونكه برآنده بز را کبز .

آقین دارا کس

یامیدان حربه واررسه رهك؟..  
نی سن اودریای مستگرهك  
میاننده غلطیده گورسهن اگر؟..

یودث

اولوردم اودهشتله جان وجگر !..  
آغوش برآغوش  
فقط آغلا یورسین .

آقین دارا کس

هوا پك صیجاق !..

کوزلرینك یاشنی سیلهرك

بتون کائناتی یاقار براوجاق ...  
باشم قرص خورشیده گیرمش گی !..

طالعین

نه گورمکده یم؟.. بر پری . وکی ،

سماده مهیای حرب و سفر ...  
بری ، اوکلرنده دلیل ظفر ؟  
گتیر مکده بر تاج نصرت سکا ! ..

یودث

تقلر سویله یورسین ، آقین ، سن بگا ؟ ..  
آقین دارا کس غایت عزون  
لسان محبتده طرز نوین .

یودث

براز گول ، دارا کس ، براز گول ، سهوین ؟  
آچلسون گل طلعتک عالمه .

آقین دارا کس

آچلمقده یم ، گل قیاس ایله مه ؛  
آچلمقده یم شرحه لردن بتر ! ..

یودث

ینه گوزلرک عینی نسرین تر ؟  
یوزک یاپمه بر گل گبی ، دَرسبو .  
طبیعی دگل ، یاپمه بر خنده بو ! ..

آقین دارا کس

او طور اقدہ اولسه طبعی گولر !!..

یودث

نہلر سویله یورسین بوگون سن نہلر !!..

آقین دارا کس جبر نفس ایله

بنی یوق قیاس ایله یث شمدیلک ؛

آقین براصیل وطن ، سز ملک !!..

یودث

نہ اغرب مددرس ، بودہشت رسان ،

نہ بارد تواضع ، نہ رسمی لسان !!..

سکره جه

وصالکله ده بن سوینمز ایسم ،

نہ وارمش گوزم اولسه مجرای سم ؟..

بنی سن ده ایتمز ایسن درکنار ،

نہ وارمش یرم اولسه دریای نار ؟..

ملکدن ده انسان گوررسه کدر ،

نہ مخلوق ایله دفع ا کدار ایدر ؟..

یودث سندن ایتمزه کسب سرور ،  
 کیمه استناداً گتیرسون غرور ؟ ..  
 اگر تاج ایچونسه بوتعظیمی مشق ،  
 سزاوار حرمت گورلمز می ، عشق ؟ ..  
 بوگون تاجلر عشقی تقدیس ایدر .  
 کز ندکدن مکره

بوسودا باشمله برابر گیدر ؛ [\*]  
 شو افسر که حرمت گورر بی شمار ،  
 فقط بر اوروشده اولور تازمار ! ..

باشنده کی الماسلی تاجی شدله یره چایوب قیزار . آقین بوتی کوزمامک  
 ایچون آلریله یوزنی اؤرت . برایی دقیقه تهیج وسکوت .

### آقین دارا کس

آغیر سویله دمسه قیرله بوکا .  
 تقریله

حمیت که عشق وطندر ، اوکا  
 بتون عشقلر پایمال اولمی ! ..  
 دها تقریله

جمالک سنک ذی کمال اولمی .  
 توقفدن مکره

[\*] - باشمله - یرینه - سرماله -

زمان جنون ايتدی ارتق گذر ؛  
 بنم شمدی عقلمدن ایت سن حذر .  
 محبتده اولق ایچون سرفراز ،  
 وظائف شناس اول ، بلا احتراز .  
 خطادر اومقصدده اولق مصر  
 که اذواقی نفسه اوله منحصر .

### یودث

مجازاتی داعی مناهی نه در ؟ ..  
 یا بیامز میسین بیگناهی نه در ؟ ..  
 هلا کسه قصدک صاچدر رسن ؛  
 حضور کده یم ؛ اشته بن ، اشته سن ! ..  
 دیلر آص ، دیلر بوغ ، دیلر کس نی ؛  
 گورر صوچلی البته هر کس نی ! ..  
 بتون کائناته اولور منفهم ،  
 که سن مدعیسه بنم متهم ! ..  
 هان فعل اعدامه قیل ابتدار ،  
 که قاتل ده اولسه ک ، بنم جفحه دار ! ..

آقین داراکس ، قلباً آغلادینی شائلندن حسن اولنور برحالده ، یودثک  
 یاشنه کیدوب ، تعظیم ایله قولندن طوتهرق ، برطرفده قیام ویا یعوده موفق  
 اولدقدنصکره مغیر و متردد و متحیر مخاطبه سنه بروجه آتی خطاب ایدر :

## آقین دارا کس

آچلسون گوزك ، انتباه ..! انتباه ..!

اولور چونكه غفلتله حالك تباه ..!

سپادن نزول ايتيمور مائده ؛

تعاونده در دائما قائده .

نه مقدار ايسه فرد ذى اقتدار ،

هب افراده اولمق گر کدر مدار .

ملککارده مقصدلر اولمق گرک ،

که نفعنده اولسون جهان مشترک .

بوگون تاجور سين ، وطن پرور اول ؛

وطن پرور اولمقدهده سرور اول .

سنگدر زنان ممالك بوگون ؛

که اول زمره دنسین کذلک بوگون .

او انسانه سنسین معین وظهیر ،

که (سلطان) ديه نام وگنيهك شهیر .

نسا نامه سن ده بالاعتنا ،

ملوکانه مکتبلر ایتدیر بنا ؛

او مکتبلره عزیم ایدوب گاه گاه ،

که تشویق اولور ایله سن برنگاه ؛



تلامیذی شادایله ، سویت ، دهنه ؛  
 سکا هم نینه ، هم ده سلطان دینه .  
 اوکا برده بر مخرج ایجاب ایدر ،  
 که اکال تحصیل ایدنلر گیدر ؛  
 که اندن گیرر خدمت دولته  
 قادینلر که غایت آجیر ملتہ ؛  
 سماہ گیدن یوللرک اسلامی  
 قادینلر که تزین ایدر عالمی .  
 سرایکده ، ای ذات فرخ نژاد ،  
 زواند نہ وارسه اولونسون مزاد .  
 جوارى بیچاره واربی حساب ،  
 کہ ایتمش سنک بابگہ انتساب ؛  
 کہ بزم جماله تجمل ویرر ،  
 کہ اهل کماله تأمل ویرر .  
 لزومی نہ در ، ای نکو بخت حسن ،  
 کہ سنسین بوگون مالک تخت حسن ؟ ..  
 بوگون ملتک جانیسین ، قیل حذر ،  
 کہ آم اسافل اولور جانکذر .

قیلان زیر دستانی خا کسار ،  
 دوشر زیر پایه ، آلوب انکسار .  
 قابو گده کنیزان بتون در بدر ؛  
 همان جمله سی وقف یاس و کدر .  
 اسار حیاتی گوروب جانخراش ،  
 اولور لر نهایت اسیر فراش .  
 مکدر بری ، یاد خویشان ایدر ؛  
 پریشان اولور ، هم پریشان ایدر .  
 بری ، زخمی ناقابل التیام ،  
 دوشر خاکه ، محشرده ایتمز قیام ،  
 اوزاقدن باقوب سروقامتله ،  
 آقارجوی اشکی قیامتله ..!  
 قو ، سایه گده آزاده سر هر بری ،  
 اوله حسن اخلاق کک مخبری .  
 نه موجب تجمل ؟ .. نه در احتشام ؟ ..  
 صباحک بو حائلله اولمازمی شام ؟ ..  
 دیلر سهن سریر تسلطنده یات ،  
 اولور موتی منتج منام حیات ! ..

ديلر دينسز اولسون ديلر ديندار ،  
 مريضه طيب اول ، فقيره مدار .  
 اوايتام ايچون كه تسئل كنان ،  
 گزر يولده ، محتاج يکپاره نان ؛  
 بيوك بر عمارت ايدرسين كشاد ،  
 اولور روح ملت بوضورتله شاد .  
 عليه قادينلر ايچون ، هكذا ،  
 كه هر بنفسده چكر بر اذا ؛  
 مختص قيلارسين بر آرامگاه ،  
 كه تنوير ايدرسين گيدوب گاه گاه .  
 جوارى ويرمش گلستانه شوق ؛  
 ايدك اونلرى سز دبستانه شوق ؛  
 كه مكْتَبده اونلر تحييز ايدر ،  
 ترقى ، تفيّض ، تمّيز ايدر ؛  
 اولور حيز معرفت واصلى ،  
 بو عالم نه در اوگره نور حاصلى .  
 يا ايتمزه نشر معارف كبار ،  
 نصل علمه ايلر صغار اعتبار ؟ ..

ملک والدگسه ، وطن مادرك ؛  
 وطنده اولنلرسه هب دادوك .  
 ملك فوت اولورسه ، گلير ديگري ،  
 كه قالماز تحكّمده اونذن گري ؛  
 كه البت اولور حاكم نيك وبد  
 مكرمه  
 وطن گيتسه اما گيدر تابده ،  
 كه جنتده اولماز اوگا جانشين ..  
 مكرمه

بنی عفو ایت ، اولدمسه آرز چوق خشین ،  
 وایتدمسه اهل حسن و جمال .  
 ملکزاده سین ، شبهه یوق . احتمال  
 كه عصیان صانیرسین بواپهانی ،  
 فقط شخصكه صانمه اتهامی .  
 خصوصاً بنم صانمه یوق تهتم ،  
 كه هرکس گبی بنده بی هتم ؛  
 كه متبوع اولورسه اگر متهم ،  
 توابع اوتهتمده در منضم .  
 یاشاه اولسه بالفرض اشتر سباع .  
 نه اولماز ایدنلر اوگا اتباع ؟ ..

نفوذ پدرله نفوذ ملك ،  
سنى بشقه يولده ايدرمنسلک ؛  
اوگا شمديک ايمه هيچ اغترار  
که کسر نفوزه ويرلدى قرار ..!  
يودث بردن بر .  
غرض اکلاشلدى ..!

آقین دارا کس تعقيب عاشقانه ايله  
يودث ! . هب خيال .

يودث  
سنگله دگل غیری اهل و عيال ،  
فقط دشمن اولمق اميد ايتلی .  
دوشرکي برطرفه  
نه امید ! ماتملرک اکلی ؛  
نه امید ..! اشکنجه لردن بتر ..!

آقین مضطرب  
چیق ، ای جان ، بو طوپراقدن آرتق یتر ..!  
امین اول ، يودث ، سوزلرم هب یالان .  
سنک عاشقکدر یانگده اولان ..!

دمنجك او بر شخص ایدی ، نابکار ،  
 که خورشیدی ایستردی ایتمك شکار .  
 اونك یوق بکا هیچده برنسبتی ؛  
 خیالت قیاس ایت سن اونکیتی .  
 زمین مفتونیته

گلیر قارشومه ، زرده ایتسه م سجود ،  
 بودت دیرلر اول آسمانی وجود !..  
 اوزوندردگر گیسوانی یره .  
 طراوت ویرر حسن و آنی یره .  
 سما آندیرر چشمی گاه گاه ،  
 که اوندنده بالاتر ایلر نگاه .  
 یوزی وقفه گاه تجلای فکر ،  
 ایدر سوی باری یه اعلای فکر !..  
 مکره جه

فرشته م وجودك ، بنم پیکرك ،  
 بنم عاشقك ، عابدك ، چاكرك !..  
 گونشسین که بن ماهکم دائما ،  
 بوکا شاهد اولسون نجوم سما !..

یان یانه و بر لرینخی طوتار کبی یوروپه رک

یودث

بنم قائمه گیرمک انسان ایچون ،  
ثوابه گیرشدر ؛ گیر احسان ایچون !! ..  
آقین دیرا کس

گنه وار حیاتمه دنیا قدر ،  
ثوابه گیر ، اولدورده ، احیا قدر !! ..

یودث

سن اول قابض روح زارم بنم !! ..  
آقین دارا کس

سن اول روح بخش مزارم بنم !! ..

یودث

هیچ اولمازسه قبرم بولور استهار ؛  
آقین دارا کس

هیچ اولمازسه خا کم گورر بر بهار !! ..

یودث

بقا بویه اولمازدی ظلمت نما !! ..

آقین دارا کس

اوگون خنده ایلردی روی سما !!

یودث

بی رد ایله جانمی ایت قبول !!

آقین دارا کس

شوبیك درلو هجرانه بر چاره بول !!

یودث

یا محو اولماسون ، رحم ایدك ، غاڤهم ؟

یا اولدور بی ، محو اوله غاڤهم !!

آقین دارا کس

قیزارسونمی ، ایواه !! روی وطن ؟

یودث

بیم سن قانمله بویانده اوطان !!

آقین دارا کس

نحمل ! نحمّل نه ممکن بوڤکا ؟

نحمل گرک ، آه ، لکن بوڤکا !!



## سارداناپال

آقین داراکس پوسوزلری حایقیره رق سوزله یوب چالغین برهالده کیدو .  
یودث ایسه آقینک آغوشدن قوپمش دنیله جک درجه ده شدید برتأثرله دوشو .  
نلاش ایله سمیرامس ، باقتری یانامس ، سوریت ودها برقاچ کنیز وسانره  
کلور .

### بونلردن بعضلری

نه اولدی ؟.. نه اولدق .. ؟ امان لطف ایدک !!

### یودث

کیدک !! کیسه بی ایسته تم !! هب کیدک

### سمیرامس

نه ایسترسکزه

### یودث

سکوت ایسترم !!

الیله تباعد امری ویرمهک هب کیدرلرسده سمیرامس قالور . یودث شدتله  
آغلامه باشلار .

آغاجدن برصدا خود بخود

نم باری گولسون سیاه اخترم !!

### سمیرامس

بویر طوغری سوزدر : غنوم وعلل

ویرر قلبه ضعف وشعوره خلل ؟

فرحدر ویرن فکره ، دیرلر ، صفا ،  
کدرلردن انسانه گلمز وفا . -

نهدندر مکدر فقط عاقلان ،

وهرب صافلردر صفایاب اولان ؟ ..

یودته قریله

بیلر سین که چوق صادق بن سکا .

آغا جده کی خود بخود

مرامک ندر ؟ .. سن ده بیلر سین آ ..

سمیرامس

حضور کده چوق یوقسه ده خدمتم ،

غیا بکده واردر براز همتم .

یودت تهدیدی بر اشارتله سمیرامسک چکله حی امر ایدر . سمیرامس یشه  
اشارتله ، فقط یاس ایله کیده جکئی آکلاتیق ایستر .

آغا جده کی دائما کند بکندینه

نه خوش منزل ایتمش اوماه انتخاب ! ..

قولم اولسه اولمازمی بالین خواب ؟ ..

سمیرامس

دیلم منتهی اول ، دیلم مبتدی ؟

دیلم مرتد اولسون دیلم مهتدی ؟

او قلبه نظر قيل که شادان دگل ،  
اونک صاحبي چونکه نادان دگل .  
آغاجده کی

جهنمك !.. الويردى حكمتلك ؛  
مكوتكدرا اعلاسى همتلك .  
يقيل !.. اوله حائل ملاقامه ؛  
بوگون صاحب اولدم بن اوقامه !..

سميرامس يواش يواش چكايير ، يودث كندندن كچر . عبدالمهل آغاجدن  
ايتير .

عبدالمهل يواش سله

وظينه م بوموقعده ، بن اشتباه ،  
غنيمت پرستانه بر انتباه . -  
يودته توجهله

بنم آمر فرقه اختلال ؛  
سكا كلمسون هيچ اويوزدن ملال .

يودث ياتديني يرده اويوركي

سني غفلة سودم ، ايواه !.. بن ؛  
نه آلچقشم آه بن !.. واه بن !..

## عبدالبعل

محل !.. سن بنی صایدك اغیاردن  
 بكا ایتدیگك جورى گور یاردن !..  
 ایدركن زماننده عرض جمال ،  
 بوگون ایلراولدك بنی پایمال !..  
 قیلوب عهد پیریده کسب شباب ؛  
 سكا قصه سویلر ایدم باب باب .  
 بواقبالى چوق گوردی نخت حسود ؛  
 گوزل دملرم گچدی گیتدی نه سود !..  
 یوزمده گورونمکه سیماى عشق ،  
 سوزمده بولنمقله ایمای عشق ؛  
 دگله شرکه حسنك گبی خلقك ،  
 بو حال اولمادی جالب دقتك .  
 بنی طرده سوق ایلهك حاجی ؛  
 بوگون دربدرسم بودر موجبی .  
 رقیم بكا گرچه اولدی خلف ،  
 قریباً اونى ایلرم بن تلف !..

یودث

سسكده دگشمش ... نه اولدك ، آقین ؟ ..

عبدالبعل

یقیناً طانیرسین ، کایرسم یاقین .

یودث دهشتله قیام ایدهرك

بعل ! ... [\*]

عبدالبعل

ویردیگك صندقم خائنه ..!

یودث قلی

سیاه ازدها شاهه قالقشم ینه ..!

عبدالبعل متواضع

زیارتله ویردمسه شاید صداع ،

مرادم سزگله فقط بر وداع .

یودث بارد

اوت ... رسم معتادی تحریفکنز :

---

[\*] بو - بعل - نداسی ایله یودثك هم معبودینی ، همده مخاطبینی

مرام ابتدیی آکلاشیلور .

براز ناهنگام تشریفگز .  
وداع ایتک اوزره قلمش خرام ،  
نه دریا وداع ایلمکدن مرام ؟ ..

عبدالبعل

عزیمت که بادیسی معلومگز :

ایماکارانه

بتون ظالم ارکان مظلومگز .

یودث

ایشتم ، اوت ، برغریب اتفاق .  
یا بلش بتون خلقه فکر نفاق .  
سزگده او عاصیلر احبابگز ؛ [\*]  
امینم ، مهیادر اسبابگز .

عبدالبعل

اوت ، بنده یغما یه دعوتلی یم ؛  
خبر ویردیله ؛ چونکه قوتلی یم .  
فقط تحت امر مده کی عسکرک ،  
تصادم گونی هرایکی لشکرک ،

[\*] - احباب - غلط مشهور و مستعمل .

میسر اولور التحاق سزه .

• ها صراحتله

ویرردم اوگون او حقی سزه ؟

یودث

دارا کس علیهنده می ؟ .. ایسته مم .

ایدک سز بو ایشده دریغ همم .

عبدالبعل

فقط معطی روز گز شهریار ،

ایدر ، منخلع اولسه ، ترك دیار .

یودث متکدر

أوت ، بلکهده ترك دنیا ایدر .

بردن بره ملهم کی

دارا کس بزی لکن احیا ایدر ! ..

عبدالبعل

دارا کس ده شور شجیلردن بری ،

که جدی بلیس آمر مجبری .

یودث

دگل مقتضی بزجه تبشیر گز .

قیر یقدر بو غوغاده شمشیر گز ! ..

عبدالبعل متور

صیانتدی انحق سزی آرزوم ؛  
یاشمشیری کسره وارمی لزوم ..  
دگلدی بو تحقیر معتادگز ؛  
دیمك اویله اوگرتمش استادگز ..!  
خی غیری تابع بیلک کیفمه ؛  
که ناموسمی ویردگز سیفمه ..!

یودث

بوگون که اونی محوه جاهدسکز ،  
اڭ آز نفسکزله مجاهدسکز .

عبدالبعل

یولده نیم غیری یوق حائلم ..!

یودث

وقوعات آتی به بن قائلم ..!

عبدالبعل

بو دوران اجلال اولور منقلب ..!



يودث متحکمانه

گيدڻ ، صبر من اولمادن منسلب ..!

عبدالبعل

محل يوق سڻا شمدي يالوار مهيه ؛

اوگون سن گلير سين بڻا وار مهيه ..!

يودث

گوگنمکده سين غالبا قوتو ،

گوگنمه فقط گوردیڳڻ خلوتو ..!

عبدالبعل

اوگون حالڻه آغلانور ، بي ریا ..!

يودث

گولونج اولمامڻ وارمی امکاني يا ؟ ..

عبدالبعل بي اختيار يودثه مولتله

فقط ! ...

يودث حایقره رق

کل ..!

جواړی وسائره شتاب و بعل رجوع ایدر •

عبدالبعل

.... قيرلسون يد التماس ؛

يارين مطلقا تيغ ايلر تماس !..

حدث ومرعته كيدر . يتون قالانلر خنده ناك تمسخر اولور .

—<تيسر>—

## منظر :

### ۴

نیتوا . رئیس الکهنه - ساشان - ك دائره دیرنده طولانی وجسیم بر دیوان . خاردن دیوارلر . بودیوارلرك اوزرنده طاش آلتوندن اویمه اوله رق آثور یالیرجه الك ییوك معبود اولان بعلك متفردآ و - می لیدار - نام معبوده نك برارسلانه راکبا و - سقارطارتا - و - روسداسدا - و - نسرون - نامنده کی آلهلرك قارتال باشی وقارتال غاغه سیله قاناتلی انسان شکلنده کی هیكلاری جتمعاً و حیوانات پرستیده دن انسان باشلی بوغه وقاناتلی بوغه وآت وانسان باشلی وانسان کوکسلی بالقی تصویرات مجسمه سی و - استارطا - نام الهه حسنك تصویر ی و دیوانك جهات اربعه مننده اصنام واوئان هیاكلی متفرقا منظور اولدیغی کبی فیل دیشندن مصنوع و مصنع ایکی معظم سررک بریسنده پرنیان زرین ایله متلبس و آئنده الماصلی عصا ایله متحکم رئیس الکهان ساشانك و دیکرنده بلند الماصلی کمر و خنجر و صر تنده برخلعت صرخ ایله ساردانا پالک او طور دیغی و بر طرفده ساردانا پالک معیتنده کی قالقانی وبالطه لی مبارزلرله دیگر طرفده ساشان معیتنه مأمور دکنکلی وطوبوزلی منجم و کاهنلرك صف بسته طور دقلری کوریلور . دیوانخانه یه ضیا ستقدن عکس ایدرکه اوزمانك مسکنلرنده بوکون اولدیغی کبی پنجره موجود اولدیغندن اولسه کرکدر .

ساردانا پال . ساشان . کاهنلر . مبارزلر . اصنام و هیاکل .

### ساردانا پال

أوت ، داخل پرده آسمان  
سز گچون نمایان ایمش هر زمان ؛  
وایتش گبی هاتقی مستشار .  
بوگون ایله مش صیتکز انتشار .

تجملہ بر شہرت کاذبہ ؛  
 او اولش بوگون سزده بر جاذبہ .  
 یا پُر خشم اولوب خالق ذوالجلال ،  
 بوگون مملکتده اولان اختلال ؛  
 بایس اربا کسله ایدوب اتحاد .  
 خروج ایله مکلر احاد احاد ؛  
 نهدن اولمادی سزجه ظاهر عجب ؟..  
 استهزا ایله  
 دگلمیدی هاتف مُظاهر عجب ؟..

### ساشان

نه وارمش ؟.. بو عصیانده عصیانی در ؟..  
 بونی قاله الموقده شایانی در ؟..  
 مسلم سنک قدرتک ، قوتک .  
 یانار طاغلری سوندیرر سطوتک !..  
 ویرر ارضه قهرک سنک ارتعاش !..

### ساردانا پال

نه عقل معاد ونه عقل معاش ،  
 نه بخت مساعد نه رأی رزین ،  
 نهده قوتم کار ایدر بعدازین !..

## سارداناپال

بَنِم ، جملہ گزرنے مقدم طویان  
کہ یوز بیکدن افزون ایمش عاصیان !..

ساشان

جنود عدو اولسده بی شمار ،  
بزایتدک تقال اولورتارمار !..

سارداناپال

قابلام ، ساشان ، آرتق اغفالکھ ؛  
بوگون لغت اولسون سنک فالکھ !..

ساشان سریرنده قیام ایله متهورآ

بن ام النجوم ، معظم ساشان ،  
یرم آسمان ، عسکرم کھکشان !..

سارداناپال کذلک حدتله تختنده قیام ایده رک

بن ابن الزمانم ، بو سارداناپال ،  
بَنِم چینہ خاقان وھندہ چپال !..

ساشان

بیلیرمین کہ نیم اولدی شمدی اونام ؛  
بَنِم ، مملکتده مطاع انام ؛  
صنم جانبدن مؤکل گبی !..

## سارداناپال

سارداناپال افراد معینه

نه طور مشسگنر سزده هیکل گبی ؟..

قیرلسون شوانف رعونت !..

ساشان

یواش !..

بودر اشته میدان ، دیلر سهن صاواش !..

سارداناپال متردد معینه خنجرله اشارت  
ایده رک

ازیلسون ، آصاوسون شوهر زه درای !..

ساشان اصنام و هیاکله عصا سیله امر و یردک

ییقلسون ، یاقلسون ، یوق اولسون سرای !..

سارداناپالک معیتی ساشانه هجوم ایچون تردد اوزره ایکن اصوات مهیبه  
ایشیدیلر . بتلر ، هیکلر حرکت ایتمک باشلار . سارداناپاله اتباعنه دهشت  
کلیر . ساشان آواز بلند ایله - سقارتی - ستاوا - بلوس - میلیدا -  
سقارطارتا - روسداسدا - لیا - بودا اسملرینی تعداد ایتمسینه حیوانات  
و تصویرات سائره دخی یورویره رک سارداناپاله توجه و تقرب ایستکارندن هرکس  
رعشه لرله یرلره قاپانوب سارداناپالده کندینی تختدن آشاغی آتار . [\*]

ساشان

سگا جانیلر سه ایدن اتباع ؛

[\*] اصنامک حرکتلری اینلرنده کیزلرهن رهبان واسطه سیله

ع . ح .

اولدینی .

بکا جسم بیروح در تباع ..!

سارداناپال قولری یرده ساشانه طوغری یورومکه باشلار .

سکا ویرسه مخلوقلر بروجود ؛

بکا بونده خالقلر ایلر سچود ..!

نه مقدار ایمش بنده گور اقتدار ،

همان سجده لر قیل سن ای تا جدار ..!

سارداناپال زمین بوس

آمان توبه اولسون ..! معظم ساشان ..!

ساشان

بنمله پریشان اولور اوغراشان ،

انعام و هیاکلی اشارت متعظمانه ایله یرلرینه اعاده ایدهرک

بنم تحت حکمده در نه طباق ..!

اینا نمازایسه ن بردها دون ده باق ..!

اولور سه م اگر کوکله پیک ران ،

نمایان اولور هپ نهان پیکران ..!

فر حده بولنسه م گروه سروش

ایتر بزم رقصه خروشا خروش .

غضبناک اولور سه م ، معاذ الرحیم ،

بورور زیر وبالایی دودجیم .

سارداناپال

فر حده بولك ، ای شه عالمین ،  
که بر شاه بیچاره اولسون امین !..  
بزی یاقه پر خشم اولوب نار ایله !..

ساشان کیزلیجه

گلیرسه گلیرنشته دینار ایله ،  
شمخانه یه گیتملی سیم وزر .

سارداناپال مبارزله دونه رک

پك اعلا !..

ساشان

فقط شمدی هر کس سزر

نهانی گرک بویله بر تقدیمه ؛  
نه مخدومه ظاهر ، نه ده خادمه .

سارداناپال

بریلر ، آمان ، رقصه گلسون براز !..

ساشان

یماندر صوگک ایتسه ن افشای راز .



## سارداناپال

متعاقباً سقفدن کوزوکن آسمان ویاخود آسمانلره اشارتلا ایدرک ،

ترانوس !! سمیروس !! تمسترمه موس !!

سرستانوس !! نستروستر !! نموس !!

اسمارخی یاد ایتیمیله باشلری چیچکلری و ضاچلری طوپوقلرینه قدر واران  
پرنه نیلگون و سمن رنک ایله نیم پوشیده وزین قانادی پری قزلری ظهور  
ایدرک بونلردن ایکسی رئیس الکهنه ساشانک باش اوجنده مروحه جنبان  
وایکسی ساق سر برده و دیگر ایکسی بجمر عطریات وانخره ایله قائم ونکه جان  
اولوب پری دخی آلتون طاس ایله دیگر بر قوگ مرصع برتبیسی ایچنه والنده  
طوتدیغی التون سبودن باده طولدیروب دست کهانته صونارکه ساشان بونی  
وقار وعظمتله ایچدکن مکره سارداناپاله تصدق یولنده اسرا واهدا وسارداناپالده  
رعشه هراس ایله تغدییه ابتدا ایتدی صرده موسیقی پریرلی برکناره دزیلوب  
ایچلردن بریسی عریان و خندان برصینی قوجاغنده طوتدیغی حالده عرقیز  
حجاب واضطراب اولهوق میانه کبر سازندکان وقولردن بر قسیده چالغیه کاه  
توفیق نوا وگاه رقصان واقتان وخیزان وققط تمسخرکنان بروجه آتی غزلخوان  
اولورلر : [\*]

موسیقی ورقص ایله برابر  
هوب بر آغزند

پری قزلری

پسند ایتدم بن جهانی اینان که !!

نه غافل پسند ایله یین ساکنان که !!

خصوصاً بودنیایی باقی صانان که ،

گوزو کمز اوکا گلستان جنان که !!

جانی کورر سین جهاندن اوصان که !!

نه دیر سین ، بو عالمده عالم می صانکه ؟!

[\*] اوتار بخارده عشقک بر طفل معصوم اوله رق تمثیل

ایدلیدی مروی اولمدینی کبی باده دخی موجود دکل ایسه ده بوتاریخ  
ناشناسلقد بهأس کورلمدی . ع . ح .

جهان بي بقادر ، آقاردش ، دها نه ؟..  
 بو يتمزي اكره ايچون بر بهانه ؟..  
 شاشلمازمي بيلمم او غافل شهانه  
 كه حكم ايتمك ايستر بوفاني جهاننه ؟..  
 جناني گوررسين ، جهانندن اوصان كه !..  
 نه ديرسين بو عالمده عالمي صانكه ؟..  
 موسيقي طور ارق سكوت ايله رقص ايتدكن صكره اولكي حاله دوام ايله  
 گيدر ، قائل اولماز او امر محاله ،  
 گلير صانكه دنيا ده شد رحاله ؛  
 ثبات ايستد كجه ، نه ديرسين بو حاله ؟..  
 اولور آدم اوغلي قريب ارتحاله !..  
 جناني گوررسين ، جهانندن اوصان كه !..  
 نه ديرسين بو عالمده عالمي صانكه ؟..  
 وجودي سراپا علودن سرشته ؛  
 دو كولمش صاچي دوشنه رشته رشته ؛  
 در آغوش قيلمش او ني برفرشته ؛  
 جهان حاكمي بر صبي جكدراشته !..  
 جناني گوررسين ، جهانندن اوصانكه !..  
 نه ديرسين بو عالمده عالمي صانكه ؟..

سم آلوده بر میوه در که محبت  
 گوزل بر نهاله ایدر عرض نسبت ؛  
 فقط صکره ظاهر اولور زهری البت ؛  
 محبت ده بونده دیمک بر مصیبت !..  
 جنانی گورر سین ، جهاندن اوصان که !..  
 نه دیر سین بو عالمده عالمی صانکه ؟..  
 نه بولدق جهانه گلوب نا گهانی ؟..  
 حکومتده گوردک نیجه گمرهانی ؛  
 که قانلرله تلویث ایدوب بو جهان ،  
 تقیخر قیلار آشکار ونهانی !..  
 جنانی گورر سین ، جهاندن اوصان که !..  
 نه دیر سین بو عالمده عالمی صانکه ؟..

ینه سکوت ایله رقصدن صکره هپسی ساردانا پاله توجه ایدرک

اگر پادشهن هر آدمدن اقدام ،  
 بری وار که سندن قدیم و مقدم ؛  
 حکومتده اولدقجه یاد ایت دمام  
 که دائم دگلدر بو عالمده آدم !..  
 جنانی گورر سین ، جهاندن اوصان که !..  
 نه دیر سین بو عالمده عالمی صانکه ؟..

## منظر :



نینواده سارداناپالک سراینده غایت اوزون فقط اکسیر براوطه .  
یالیزی دیواره حکمدار رسمری وشکار وآلای ویکید رسمی تسویرلری ،  
سقف مذهب . سن فیل وینه قیمتدار براغاج ایله سنطرنجلاش قپولر ،  
سدرلر ، کرسیلر . برده آویزه بیوکلمنده شمعدانلر . سارداناپال  
برسیرده ، صنادید دولت کرسیلرده ، رؤسای عسکریه سطح زمینده  
وخدمه سرای ایسه آیاقده واوله انک جهات متفرقه سنده صف بسته ونشسته .  
سارداناپالده تور وحدت وسائر حضارده خوف وخشیت . سارداناپال بعضاً  
فوران ایله سریرنده قیام ایتدیجه حاضران دخی برلکده قیام واورونجه ینه  
هپسی برلکده قعود ایدرلر . مکالمات آتییه بوتمریفته توفیقاً واقع اولور .

حاضر بولنانلرک بنام اولانلری : سارداناپال ، سباد ، هراستمناس ،  
زفیر ، آستراس ، سیروز ، امرای جیش وتوابع خاصه حکمداری .

## سارداناپال سباده

هب آفاقر خون ایچنده بوگون ؟..

شواهددن ایتکده دشمن سوکون !..

بی مطلع قیلمدک اوکجه دن ؛

دیمک سنسین اعدایی تشویق ایدن !..

سباد متبلبلانه

قولک سویله مشدم : بوزوقدر هلال ؛

اولور مملکتده بوییل اختلال

## سارداناپال

ماصال دینگله مك و قتم ايتدى گذار؛

نه انكار جرم ايت ، نه ده اعتذار .

بومشكل ايشى ايله زندانده حل !!

سارداناپالڭ اشارتى ايله برقاق مسلح نفر سباده يرندن اينديروپ كوتورمهكه  
حاضر لاورلر .

سباده تعظيم ايله وكيدركن

او زندان اولور بر مساعد محل ،

دوشونمك ايچون كه نه در تهتم !!

آستراس

كرامت بيوردك ، ولى نعمتم !!

دېمشدك اوگا بزكه قحط وكساد

اولور پيشوای نفاق و فساد .

سارداناپال

مرامك نه در ؟ ..

آستراس

آه ! او خائندى پك .

## ساردانا پال

يا شخص عقور گمي. صادق كوپك ؟..  
بو ملكي باتير مق قورار مش سباد ؛  
اوزاقدن گورونمش سكا تندباد ،  
نه دن سن گلوب ویر مامشده خبر ؟..  
او زندانه گيتدی ، فقط سن گبر !..

مسلحار اونی ده ساردانا پالک اشارتيله کوتوره جك اولغله دوشوب بايقین  
حالده اخراج ایدیلیر .

## ساردانا پال هیئته

اهاننده اولمق ایچون سز مصر ،  
صداقت همان صدره می منحصر ؟..  
او باش سه بوگون ، سز لر اعضاسکنز .  
که محتاج طعن و تقاضا سکنز !..  
عجب صاحب مهري اتهام ایچون ،  
خطیاتی عرض وافهام ایچون ،  
بو هیئت اولوب یکو جود وفاق ،  
چیقار مقمی ایجاب ایدر مش نفاق ؟..  
سزک بویله می گچدی اوقاتکنز ؟..  
بو وادیده می اتفاقاتکنز ؟..

قالقوب اوطورارق

نه تحديت در بوعطايامزه ..؟  
 فصل اقتدار وصايامزه ..؟  
 اگر لایق نفی ایسه اشقیا ،  
 سزا اعدامه اليقسگنزی بی ریا !..  
 که سزا اشقیادنده عاصیسگنزی ،  
 که بادی حُر و معاصیسگنزی !..  
 یا ایلر سه غارت صنادیدمز ،  
 نه ایتمز خسارت حیا دیدمز ..؟  
 بلاد و ممالك خراب اولمده !..  
 بیابانه دوندی ، تراب اولمده !..  
 مخربلر اولدجه معمار ملک ،  
 فصل قابل اولسون یا اعمار ملک ..؟  
 اوت ، آستراس ، چونکه قحط و غلا  
 اولورمش دلیل الظهور بلا ؛  
 باتجه دگین خونه غرب و شمال ،  
 دکلمیدی لازم یا برگوشمال ..؟  
 یاغوب برج و بارولره بارقه ،  
 دوتجه قدر مملکت مشرقه ؛

چکا چاک اولنجه قدر روی ارض ؛  
اولنمازمی شورش بوخاقانه عرض ؟..

ینه قیام وقعوده

سهام بلایا سرادق شکاف  
اولورکن ده می عزلت واعتکاف ؟..  
اهالی بنی رفع و دفعه قیام  
ایدنجه قدر می ویرلمز پیام ؟..  
فقط شبهه ایتم بوايشده قدر ،  
سزکچون ده نکبت ، جزاخلق ایدر !..

هرکس اقتدا ایتمک اوزده اورته یه کلهرک

اولوب ، آستراس ، راهبر دولته ،  
بولورسه ن اگر چاره بوعلته ،  
شوساعتمده که امر قتلک ثواب ،  
سنی عفو ایدردم ؛ جابوق ویرجواب !..

آستراس

آمان ایتمه ، شاهم !..

ساردانا پال

آمان یوق بوگون !..

آستراس

تداوی به امکان ، زمان یوق بوگون !..



## سارداناپال

---

قضادر، بو بردرد نا گاهدر !!  
بوگا پادشاهم ده آگاهدر ...

## سارداناپال

امينم، سن ايشدن خبردار ايدك !!

معينده كيلره آستراسي كوستره رك

اوروك بويوتتي !! صكره بردار ايدك !!

آستراس ييهوش هراس برحالده كوتوريلور . سارداناپال سيروزه خطاب ايدور، فقط استهزا ايله :

سيروز، سن نه ديرسين ؟ .. اراده ك نه در ؟ ..

طوبالسه نه ده برفارس اول مقتدر ؟

نصل سوق ايدرسين بو كمراه اولان توسني ، [\*]

اگر صدراعظم قيلارسه م سني ؟ ..

## سيروز

سزي گچمه دك چونكه توقيردن ،

گچك سزده آرتق بوتحقيردن .

تمسخرسه مقصد دونك آخره ؛

دگلدور سيروز چونكه برمسخره !!

---

[\*] مسوده سنده بويله اولديغندن عينا ابقا اولندي .

حاشيه طابع

## ساردانا پال

بيان ايت بگا حالي لشكرڪ .

## سيروز

نه در رأي و تدبيري سرعسكرڪ ؟ ..

اوڻا واقف اولق ڳرڪ آولا .

## ساردانا پال

بو عالي مقامه ايدوب اعتلا ،

وزارتله ده مشهر ، معتبر ؛

عسا ڪر نه حالده ؟ .. فقط بي خبر ! .. -

جهان قحط ارزاق ايله بي مجال ؛

بزي محو ايدن بونده قحط رجال ! ..

## هر استستناس

لزو مندن افزون اولشڪر بوگون ؛

ظفر بزده در ، غير منڪر بوگون .

## سيروز وقار ايله

بيان حقيقت زماننده يز ،

زمانك يد بي اماننده يز .

هر استستناس

او عسكر خصوصنده يوق احتراز ؟  
فقط بوشه مالیه بيلمم براز .

ساردانا پال زفيره

نه دير سين ؟ ..

زفير

خزائن طولو كانگنز ،  
كه يوق صرف ومحو ايتك امكانگنز ! ..

سيروز

خزينه كده موجود اولان ، اى ملك ! ..  
علامات افلاسدر شمدليك .  
يتر آچه من سوقه انجق گرى ،  
بوسر عسكرك بولديغى عسكرى ! ..

ساردانا پال قلبي

بكا طوغريلقدن اورر دم هان ؟  
بو اوق سوزلى شخصك آلندن آمان ! ..

اورتبه

ديمك دولتم عادتا منقرض !!

هر استستناس

سيروز اويله در ، دائما معترض

زفير

دگلدر سزا قولى امنيتته

اوبر فردعارض بوجعيتته !!

سيروز

دم صبحه بگزر گولر يوزلرى ؛

يالاندر مدهنلرك سوزلرى .

سنزه هر سوزم گلسه ده اعتراض ؛

اونى رد دگل مانع انقراض .

ساردانا پال

مستبب كيم ادباره ؟..

سيروز هيئى كوستره رك

مقابللرك .

مخاطبلر گله مقابللرك !!

يوزنده عيان سيرت ميمنت ؛

ايچنده نهان صورت ملعت .

خطابنکده توصیف ایدر ، مدح ایدر ؛  
 غیابنکده تزییف ایدر ، قدح ایدر .  
 لساننده تبشیر بزم صفا ،  
 میاننده شمشیر عزم جفا !..  
 سعادت کونی یار مردی دئار ؛  
 فلاکت کونی مار سردی نثار !..  
 ثنا کار الطافکنز جملة ؛  
 هواداراتلافکنز وهلة !..  
 امل ، وسع حال و عمل ، جمع مال ،  
 غرض ، احتیال و مرض ، احتمال !..  
 طاپار ، اولسه عادت گوروب هیکلک ؛  
 قاپار ، بولسه فرصت ، چکوب مأکلک !..  
 دگل دائما ارتشاده مکب ،  
 دگل دائما مال ایچون مرتکب ،  
 سنی گورمک ایسترده پادر رکاب ؛  
 ایدر پای بوس اوله نی ارتکاب !..  
 سری نعل رخسکنده بر جابلوس ،  
 قورار افسرک اوزره قیلمق جلوس !..

عمومی سکا ایلہینلر فدا ،  
 فدا یه سنی ایتدیلر ابتدا !..  
 ممالکده بتمش ذخیره یله زاد ،  
 قلندی بوگون تخت و تاجک مراد !..  
 سنی صائدیلر خصمه انجام کار ؛  
 اہانتلری اولمایور آشکار !..  
 ریادن ، خیانتدن ایتمز حیا ،  
 مقارنلرک بویله در بی ریا !..

مہکسده برچوق تہیجاندن صکرہ دوام ایدرک

سوزمده ، بیلیر سین ، براز آقصادم .  
 بقای وجودک دگل مقصدم ؛  
 گورر ظلمکی گرچه ملت سنک ،  
 وجودکله قائمدی دولت سنک .  
 یازق کہ بوجمعیّت ذی قدم ،  
 زوالکله اولمقده زائل بودم !..  
 یازق اولدی درخانہ سلطنت ،  
 زمانکده برلانہ شیطننت !..  
 دوشوردک زمینہ او مرتیحی سن ،  
 خرافاتہ آتدک بوتارییحی سن !..

هواجس يولنده ييدك مالكي ،  
مناهي يه حصر ايتدك آمالكي !!  
قيروب حقي ، طاپدك شوكا هنلره ،  
قابلدك بولچق مدها هنلره !!

تهيجات

يوزكدن ، نصل ايتمه يم شتم وسب ؟!!  
ذليل اولدى بر قوم على نسب !!  
يوزكدن يتيم اولدى بيك عائله ،  
ظهور ايتدى هر اوده برهائله !  
آشكار هر برى ظلم و بيدادكي ،  
افقلرده گيت ديگكه اجدادكي !!  
نه ملككده قالدى اهميتك ،  
نه ده اجنييلرجه حيثيتك !!  
بوگون كندى فكر كده بولدك فريب ،  
بوگون كندى نسل كده دوشدك غريب !!  
بيلنمز سوري ، يوقسه امتى بو ،  
چوبانلقمى ، ياخود حكومتى بو !!  
اونوتمام بو هجرانى اولسه م تراب ....  
خراب اولدق ايواه !! يكسر خراب !!

كندى يره آتورق

## سارداناپال

قاپان یرلره! .. حدتکدن دوگون! ..

## سارداناپال

بودیوانه‌یی کیم گتیردی بوگون؟ ..

## سیروز

قالقوب طولاشه طولاشه وآواز بلند ایله

مضارب، محقر! .. رذیلز، خراب! ..

## سارداناپال

طوپال! .. صوص! .. یتر ویردیگک اضطراب! ..

## سیروز

طوپال اولدیغم بللی، سارداناپال!

فقط طوغری بولدن گیدر برطوپال!

ایکی اوچ صباح اولمادن مبتسم،

محقق بو اقلیم اولور منقسم،

بودیوان ایسه آشیان غراب

ینه کندیخی بره آتوق

خرابز، خراب! .. اه! ..

## سارداناپال

سنسین خراب!

شدت وصولتله سیروزی خفجرلر . بهت و سکوت براز مکره



سيروز مجروح

بني اوردي بر شاه صاحب ... کلاه ..!  
بومي حق صادق ... لرڻ اي ، الاه ؟..

ساردانا پال

که — يروزي اوره جني صروده يوزي غايت قيزارمش ايدي ، اوردقدين  
صكره بوسوزلرله تسليم روح ايتديكني كورنجه بردن بره چهره سته بر صاريلق  
كلير ، خدمه سته خطاباً :

سيروز اولدي . حرمتله تدفين ايدك .

والماسلي خروانيه سني چيقاروب آتهرق

بوشاهانه خلعتله تكفين ايدك .

هرم اولمالی دائماً محترم .

برقاچ كشي سيروزك نعشني وكسوۋ حكمداري بي كوتورولر ، ساردانا پال  
خلجان ايله سريره طايانور . براز صكره :

صناديددن بعضي سي

بوعين كرامت ..! بومحضا كرم ..!

ديكرلري

سزك شخصكز هيچ گوررمي زيان ،

که هم شهسگز ، هم ده شيرثيان ؟..

ديكرلري

يتر قبض ارواحه بر حمله گز ..!

ساردانا پال بتون حضاره اشارت تبعيد ايله

يتر ، چونكه منفي سگزر جمله گز .

هب چيقار لر ، ساردانا پال اوديان جسيم ايچنده يالگزر قالير .

بودنا اکابرله پرشين و شان ،

امينم که بن متفقدر ساشان !..

ساشان متفق صکره اعدا ايله ...

برابر او اعدا او دا ايله !..

بنم می صوچ ، ای خالق عالمين ،

اولورسه مخالف زمان وزمين ؟..

قباحتی اولمق هوادارزن ؟..

يا اونلر ايچون کيم دگل ناله زن ؟..

قاديندر ، اونی قيرماقددر مرام ؟

قزم اولسه ده ايلرم احترام .

بويله سويلتمکده ايکن کریمسی يودث کلکاه بردن بره عنف وانفعال  
ايله باغيره دوق

نه گلديک ؟.. پدر خاشی بی حیا !..

حضورم سکا لایق اولسونمی یا ؟..

يودث کيده جک اولغله يقه سندن طوتوب کتيرو .

يودث

نه ياپدم ؟.. نچون اولدگزر منفعل ؟..

## ساردانا پال

نيچون ردّ تڪليف عبدالبعل ؟..

قولندن ماوتوب سيلڪرك

شقيزلله مي گوردم اور تاق سني ؟..

يودث

ولي نعمتم ، آه !...

ساردانا پال يودثي يره چلو پهرق

قالتاق سني !..

كبدو .

يودث

يا لكز . متوجع بر حالده قاله برق غيابه خطاب ايله

بدر !.. اولدير شسه بني نيتك ،

امينم كه واردر صلاحيتك .

فقط وارمي حقتك بوتزويچ ايچون ،

بني شاه غولانله تتويچ ايچون ؟..

وجودم سنك ، يوق انائيتي ؛

قزك كندينكدر نسايتي . [\*]

صكروجه

[\*] انائيت - نسايت - ياكلش ايسه ده قوللانلدي .

ع . ح . ۰

همان هرنه يولده گيدرسه ملوك ،  
 دگل خلقه لازم او يولده سلوك .  
 اگر طوغرى يولدن دگلسه ن جدا ،  
 سگا زير دستان ايدر اقتدا .  
 گيدرسه ن خلافتده مرد وزنك ،  
 اولور پيروانك فقط رهزنك !!  
 خود بخود زمين تضرعه

الهي !! سلامت بزمچون محال !!  
 اسار اولسه ، قيد ايتم ، انجام حال ،  
 كه زندان قيد اولدي ذاتاً جهان !!  
 گليرسه فقط ، نيلرم ، ناگهان ،  
 آقبن ، بلده شمشير ، آنده سنان ؟  
 گليرسه ، اولوب رهبر دشمنان ؟  
 بوجمعيته قورديني دام ايچون ،  
 گليرسه ايم شاهي اعدام ايچون ؟  
 گوگنمكه نفسنده كي قوته ،  
 گليرسه بنى كندينه دعوته ؟  
 گلوبده اودشمن محبتلى يار ،  
 گيدرسه آلدن بنم اختيار ؟  
 مكرهجه

مظفر آقین اولسه قالماز بابام ؛  
 پریشان اولور عائله م ، اقر بام !!  
 بابام اولسه غالب ، آقین خا کسار ،  
 که خا کنده عمرم بولور انکسار !! -  
 اولور مش بعل بونده آز چوق معین ،  
 اولومدن بتردر او نعش لعین !! -  
 مزار ، اونده یوقدر تدائی ، قدم ؛  
 مساواته نائل ملوک و خدم .  
 مزار ، اڤ کوچک بریر اولسون ، دیلر ؛  
 اوکا حاکم اولماز جهانگیرلر .  
 اواقلیمه ، خالیسه مقدوردن ،  
 ضرورت ده گیرمز ، باقار دوردن .  
 نه وار روحم اولمازسه پر بال و پر ؛  
 اولور جسممه سنک مدفن سپر .

سمیرامس کوله رک

یودث مایوسا کیدرکن بردن بره قارشوسنه چیقروق  
 بوگون غالباً بزیننه عاشقز .

یودث

یتیم اولمادنسه رضاسیله قز ،

پدر قالسون اولادی یوق بر عقیم !..

سمیرامس

بو ، بر منتج یأس ، فکر سقیم .

یودث

آرارسه یودث ، ایشلر اولماز گناه ،

ییلانلر ، چیانلر یرنده پناه !..

وجود مده قالمقده روحم غریب ،

تباعد مقرر دیمك عن قریب !..

وهیچ طینتم طویمور اضطراب ؛

دیمك اولمه دن قلباً اولدم تراب !..

سمیرامس

وطن پرور اول ، برده سهو ملتی ؛

بیلر سین حیاتك نه در علی .

وطنله شو جمعیت دربدر

سگا بر حیات اولمای امرایدر .

او جمعیت اقدم گرک یاردن ،

چیقار یارلر چونکه اغیاردن .

او ایشلرده قادر گرک تاجدار

که هر کس اوله اونده بی اقتدار .

اولنجه بو عنوانه مظهر کشي ،  
 خوار قدن اولمق دوشر هر ايشي .  
 گوزل يوزليلک اولسه ده ملتفت ،  
 گوزل بر مثال اولمادر معرفت .  
 ايچک مرد اوله خلق ايله مشترک ؛  
 قادينلرده يوق صانماسونلر يورک .  
 بلند اولسون اکليلدن ناصيه ک !!  
 يودنک جينني اوپر .

### يودث

سمير ، طوغري ، پک طوغري در توصيه ک  
 سني بونده ، اي همدم مهربان ،  
 دارا کسله گور مکده يم همزبان .  
 وطندر بنمده وطن والدم ؛  
 - خصوصاً که بر والدم يوق بودم . -  
 نه ايتدمسه عمر مده بن اتخار ،  
 اوکيا عرض ايله ايلرم افتخار .  
 شووار که وطن قالمور بر حيات :  
 دگل غيري ممکن برابر حيات ،  
 تغلبه موت قديم وقديد ،  
 غروب اولماده هر جهتن بدید .

سپای وطن گوردی بیك انكسار ؛  
 بتون اختران اولدیلر خاكسار ..!  
 هانی ملت اظهار ایچون یاوری ؟..  
 وطن یوق که اولسون وطن پروری !..  
 براز مکره

خصوصا پدر ایله نیجه وفات ،  
 ایدرمی اومادر بکا التفات ؟..

### سمیرامس

بقا بولماقله سزك طنطنه ،  
 قنای گلیر ملت وموطنه ؟..  
 ملكزاده سین سن ، یارین بی پدر ،  
 سنی خلق ، مملوکه می عد ایدر ؟..  
 بوفکر حمیت ایدرسه دوام ،  
 سکا طاپسه لایق خواص وعوام .  
 گوررلرسه جمهوره تابع سنی ،  
 شهنشاه بللر توابع سنی ،  
 تحول قیلوب انتباهه منام ،  
 بوگون فرصتی ابتدی خلق اغنام .  
 شهك حدی یوق گرچه بیدادینك  
 فقط خاطری واردر اجدادینك



حمیتله قیل ابتدا خدمته ،  
که وارث اولورسین اوگون حرمته  
ایدوب عجزی قدرت گلوب برطرف  
پدر سایه سنده بولورکن شرف ،  
آلورسین همان کندی سایه کده نام .  
مکرهجه

دارا کس سه ذاتاً مطاع انام ؛  
بلیس یعنی جدی اولتجه ملک ،  
اولور حقّی البت ولیعهدک ؛  
ایکی اختر ایلر دیمک بر دوگون :  
ایکی دفعه سلطان اولورسین اوگون .

### یودث

نه لرسویلیورسین ، سمیر ؟ .. دقت ایت ! ..  
دوشوگ ، یاد جنسیت و خلقت ایت :  
ایدن بر قزگ عجز ایله اتّصاف ،  
او حسلردن اولمق گرک قلبی صاف .  
نه لازم دوگون صلح اولونسون یتر .  
مکرهجه

بودر مانله اولمقده دردم یتر ! .. —

بو یا گلش حقیقت یاقشماز عیان ،  
 بو مظلم بداهت قلنماز بیان .

### سمیرامس

بو هیجای ییجا ، بو سعی عذیر ،  
 اولوب یارین البت نهایت پذیر ؛  
 که بر حسن صورتله تألیف بین ،  
 یقیناً اولور غایه جانین ؛  
 گلوب رقصه هب اصدقا ، اشقیا ،  
 دوزر خانه سوره آتوریا ؛  
 گلوب سودیگک ، شرم ایله بسته لب ،  
 ایدر دستگه ربط دست طلب .

### یودث

او یولده تتوج بن ایستر ایسم ،  
 بعل نامنه اشته یوز بیك قسم ،  
 دگل برتر اولسون دیو اخترم ؛  
 فقط ملت و ملک ایچون ایسترم .

ولکن پدر - آہ ! . . . لکن پندو -  
اوگون ہب پدرلر بنی رد ایدر ! . . .

سمیرامس

بوخلق یتیمک سن اول مادری ؟  
پدرلر سکا مرض ایدر دادری .



منظر :

۶

سارداناپال کلیر . سمیرامس بر اشارتله او طه دن چیمار . سارداناپال ایله-  
یودث برابر قالورلر .

### سارداناپال

ایشه طرد هیئته ویردم ختام ؛  
بوگون مستقلم ، نفوذدم تام .  
سنک رایگی ایسترم بن ینه :  
نه دیرسین او خائسلرک نهینه ؟..

### یودث

دیرم بن که : - مأذون ایسهم جراته ،  
نیچون او کجه یوز ویردگز هیئته ،  
نیچون پایلهر صاچدگز بیلمدن ؟..  
او خائسلره بخش قدرت نهدن ؟..

### سارداناپال

دیورلرکه اولمش ممالک خراب .  
بن اولام یا بوندم کذلک خراب !..

## سارداناپال

عدوشهره گیرمکده بولسون ظفر؟

یا دنیا ده بولمازی یم بی مفر؟..

یودث قلی،

مفری اولورمی شه اظلمک؟..

سارداناپال

گیدوب اڭ گوزل سمتنه عالمک،

گوزلرله اولمازی یم دمگذار؟..

یودث

قبولنده ایتسه م بونک اعتدار،

برازحدت ایلسکمز بلکه سز.

سارداناپال

ایدرسین بیان فکرکی شبهه سز:

یودث

مصیبت، اولومدر، مساواتدوست؛

که نزدنده بردر اریکه یله پوست.

یا برملکه طاری اولنجه کدر،

ادانی یه می حصر تاثیر ایدر؟

## ساردانا پال

عمومی اولان بر ضرردن ده یا  
نصل استفاده قیلار اولیا ؟..  
امانمی بولور شهر اشکنجه دن ،  
خصوصاً اونى کندی ایجاد ایدن ؟..  
یری اویله شاهک یا خاک خسار ،  
یا چاه عدمدر ، یاسجن اسار !..

## ساردانا پال

نه لازم فقط بویله حدتلی سوز ؟..  
یودثک دوداغی صیقرق  
بونازک دهانده نه شدتلی سوز !..  
بردن بره  
بیم وارسه دنیاده برقاتلم ،  
ینه کندمم ، بیل !..

## یودث قلی

بوغایت الیم  
قناعت ، اولوم بکلیور ، بی خبر !..  
ساردانا پال  
اولور دارمن گرچه زیر وزیر ،  
فقط دشمنه قسمت اولماز ینه !..

یودث قلبی

مخالف کلیرسه سوزم رأینه ،  
اونی بلکه شمشیر ایله جرح ایدر ؛  
اولور نام معیوبی : قاتل پدر .

سارداناپال

بوتختی ، بگا اولما نیجه مقام ،  
لهیب قضا ایله سون التقام ..!  
سنگ ده ایدر اعتلا مرتبه ک ؛  
رماد ایتدیگم گون شوایوانی بن ..!  
حرام ایشلری کوردیگیچون مباح ،  
طاغتم بتون هیئت دون صباح ؛  
- جدیدک بتیرمکله تنکیانی ،  
قدیمک دوشوندمدی تشکیلی ؛  
اوامر طاغتمدی ، اولر مگر  
علیه مده اولمشدی جان و جگر .  
دیدم : « زده ؟ .. گلسون ! .. » مقدس ساشان ؛  
اوده هجرت ایتش ، بوگون بی نشان ! ..  
دیدم : زده آرتق مناصبی یوق ؟ ..

## سارداناپال

حکومتی یوق ؟.. یوقسه ناصبمی یوق ؟..  
نه در امر ونهیم ، بجاء ، نابجاء ،  
مؤثرکن ، اولمازمی مشر رجا ؟...-  
دیمزلرمی - هر فردہ گلدی کسل ،  
امیدی کسوب ایتدیلر سیفی سل ؛  
اهالی بوگون خونگه تشنه لب ؛  
کرك حققی سندن ایتك طلب ؟...-

بوصره ده خارچدن های مولر عکس ایدر . ساوداناپال ایله یودث  
مہتابلفہ چیقان برقاپویہ طوغری کیدوب دیشاری یه باقارلر .

## سارداناپال

نه در بوشہات ؟.. نه بوعربده ؟..

یودث معنیدار

دعایہ کیدنلر دیمك معبدہ .

خارجده کلہانك

اولومدر ، اولومدر الہ زمان !..

زمان در زمان آلہ بی امان !..

## سارداناپال

کوزلری قاراروب دوشر کبی برکنارہ کیدرک  
نه در ؟.. کورمی اولدم ؟.. نه در بوظلام ؟..



## ساردانا پال

یودث

اهالیدر ایتمکده عرض سلام .

کلبانک

گبر! .. خانمانسوز دوزخ قرین! ..

گدا چشم شاه ممات آفرین! ..

ساردانا پال مہوت

نہ یاپدم بوخلقه! ..

یودث

فنا یاپدیگز! ..

ساردانا پال

نصل! ..

یودث سکیته

یقیدیگز! .. ازدیگز! .. قاپدیگز! ..

بردن مہتیج

بونک کنندی ضرب و سلب ایتدیگز؛

اونک اوغلنی قتل و صلب ایتدیگز! ..

سبب ویردیگز محوینہ دادرک؛

طمع قیلدیگنر مالنه مادرک!..  
بوگون صاندیگنر برپوله خواهری ،  
دگرکن جهان ذاتنک جوهری !..  
یارین سوء قصد ایتدگنر دختره ؛  
غریق اولدی سیل سرشک تره !..  
ولیعهدگنر ، شخص عالی تبار ،  
که سزدن زیاده یدی ذی اعتبار ؛  
- سزادر بوهم گریه ، هم خنده یه . -  
سورولدی - یرمده گوزی وار - دیه !..  
اومتقاده ایتدیسه احیای نام ،  
آنام قیلدی زندانده ترک منام !..

### کلبانک

گبر!.. ملتک موجب ذلکی !..  
وجود خیشی وطن علی !..

### یودش دراله

نه یایمشدی ، بیلیم ، اوخاتون سزه ؟..  
نصل برگنهکار ؟.. مفتون سزه !..

ویروب پایه لر ، صگره قیصقاند گز ؛  
نهایت ایچوب خوتنی قاند گز !..  
دگشدر دگز روزوشب بر حرم ؟..  
بوگون هپسی مرحومه ، یاخود ورم !..  
اوتوز قز چوجوقده بوگون پنجه گز ؛  
طقوز زوجه اوستنده اشکنجه گز !..  
برادرلرم هازم آخرت ،  
بتون اولدیلر نائل مغفرت !..

قهقهه واس استغفاف ایله کوزده

کلبانک

کبر !.. بت شکن ، ای شه خودستا !..  
کوزک گورمسون غیری صیف وشتا ؟..

سارداناپال یودنه هجوم ایله

بوآلچاقلره پایه ویردگی سن ؟..

یودنک بر طرفه صیغندیغی صروده

کلبانک

اثرمی قیلار اشکریزان ایسهن ؟..  
سنک خون ایدی ایچدیگک دمبدم !..

ساردانا پال حدقله كزینه رك

هائی نرده اتباغ؟ .. نرده خدم؟ ..  
حكمداره می یوق معین ومدار؟ ..  
بودنیاده یالکزمی یم حکمدار؟

یووث حمرت حجاب ایله

خصوصاً نه مقصدله ، بیلم نهدن ؟ ..  
که بنتیمدن حیا ایتهدن ،  
قارا کلقده ... خرسزگی ، گزلیجه ...  
بنی صویمایه کلدیگنز ، برگیجه ....  
رعشه لرله

دکلمش کی لغت آلق حرام ،  
بنی آلمایی ایتدیگنز سز مرام ! ..

ساردانا پال

که یووث سویلرکن یواش یواش تقرب ایتس ایدی ، کیژله دیکی خنجر النده  
یتر ، ایله دك غیرى افشای راز ؛  
باشم راحت ایتسون ، خموش اول براز ! ..  
یووثی اوواوق خارجه  
گل ! ..

## یودث

ایواہ ! اور ... بردہا اور بگا !..

ساردانا پال کیرن خدمتہ

شونی قالدیرک اور تہ دن !..

باش خادم

چوق فنا !..

نہ ایشدر بو ؟..

ساردانا پال مستہزی

عفوایت ، ثواب ایشلہ دم .

آقین او قشامقدنسہ بن دیشلہ دم !..

دہا مستہزی

ایدر بلکہ ذہ فتنہ میل نیام


حدتہ خدمتہ

چیقک !..

اوشاقلر یودثی کوتورولر .

ایچلرندن بریسی

زخمی بی شک بولور التیام !..



منظر :

## ۷

ساردا ناپالک ياتاق اوطه سى . قارا کلق . بعضاً شمشک .  
صکره يته شمشک حالنده س سنبوت که زنجير ايله باغلى کلير .  
صکره برقاچ خادم .

### ساردا ناپال

بو کيمدر ؟.. نه گز مکده ميدانده بو ؟..

سنبوت ايلرولر .

کبرمش دگليمدي زندانده بو ؟..

سنبوتک اوستنه يورويهرك

بو ديوانى زندانمى صاندك ؟.. گرى !..

سنبوت اونك اوستنه يورور .

وليهدمك نسخه ديكرى .

تهقهله ايدر .

### سنبوت

او زندانده آرتق دگل اشكبار ؛

چيقار مدفتندن فقط برغبار !..

ساردا ناپال رعشه ور

فقط سن ايدوب ميل چاه ججهيم ،

کبرسهن بوگون کيمسه اولماز رحيم !..

أوت ! كيمسه اولمازده باركله زار ،  
جنازهك قالور اورتهده بي مزار ..!  
ساردا ناپال قورقو ايله بركنارده طور . سئوت دوام ايدور .  
يد اغتصابنده دولت رهين ،  
وطن دشمنى حكمدار مهين ..!  
كتيردم سكا قارشى وجدانكي ،  
كشاد ايلهيم يعنى زندانكي ..!  
جهنم كي خلقه آچسون دهان :  
نهر وار دروننگده كورسون جهان ..! —  
بريشان سن ايتدك بو جمعى ،  
ييدك ، سن بتيردك بو ذرتى ..!  
اوطان كوكده ساكن مشايردن ،  
اوطان يرده نائم جمايردن ..! —  
بو قوم نجيبى سن ايتدك ذليل ،  
بو ذلّ عظيمه سن اولدك دليل ..!  
شو اشياى خالق نمدان اوطان ،  
زميندن حيا ايت ، سيمادان اوطان ..!  
سكا لعنت ايتسيون بتون روحلر ،  
بتون نعللر ، جسم مجروحلر ..!

سارداناپال قورقو جسارتی ای

یقیل شوندن ، ای لاشه ذی عدم !..  
یاشارمی بوخلق ایتمه سفک دم ؟..

سنبوت

سزا عهدکه دینسه : دوران خون ،  
سهمان نزول ایتسه باران خون !..  
جهان باتسه هب سونسه سیارلر ،  
قابانماز سنک آجدیغک یارلر !..

سارداناپال

حیطی دوشوگ ، خلقی سنجیده قیل ؛  
نه یادمسه بیلدیر ویاخود یقیل !..

سنبوت

بودولت سکا قالدی اجداددن ؛  
سن احفاده عاریسین امداددن !..

سارداناپال

او احفاده ویرمک نیچون اقتدار ؟..  
اسافلمی اولمق گرك حکمدار ؟..



سنوت

کمیگر چورر ، جان وجوهر قورر ،  
سنک زخم بیدادک ایشار طورر ..!  
الاهه طوقونمقده هر برایشک ؛  
معابده در صاپلی قاهر دیشک ..!  
بوسجن مظالم بولور می فنا ،  
که تسجین ایچون رتی ، قیلدک بنا ؟ ..  
هب افراده تعلیم ظلم ایله دک ؛  
بتون ملکی اقلیم ظلم ایله دک ..!  
خدا سندن ایتدک جدا ملتی ؛  
بوگون سومر اولدی خدا ملتی ..!  
سارداناپال قهقهه ایدر .

سارداناپال

اوخلق اولمادن بویله اخلاقسز ،  
مرجحدی عندمده خلاقسز ..!

سنوت

اولوب مهد عصمتده مقتل عیان ،

قان اچمکده صبیان بی آشیان !!  
شباب اولماده فاسق و فتنه خیز ،  
هرم مکر ایله رهبر رسته خیز !!

### ساردانا پال

یوق اولمقله امیدمن ، وارمن ،  
بوزولدی هب اخلاق و اطوارمن :  
حمیت محقر ؛ فضیلت شتیم ؛  
هنر بی صیانت ... دها بر یتیم !!  
ملوکک یولنده دگل همسلوک ،  
توابع بوگون مقتدای ملوک .  
اگر زیر دستان اولورسه شریر ،  
شاشلماز اشر اولسه صاحب سریر !!

### سنبوت

سیروز شونده قالمشدی بر قهرمان ...

ساردانا پال مستوی و دها چری

سن اوندن بیوک قهرمان زمان !..

سنبوت

وطنده او قالمشدی شخصاً مطاع ،

او امید ملتدی بی انقطاع !..

بولور نشئه سیله بودرده علاج ،

یورکلرده قالمشدی براختلاج .

مداهنلری قهر ایچین پرلهیب

او قالمشدی بر شخص مرد و مهیب !..

وطن فکری بر او نده قالمشدی صاف ؛

او ایتمشدی اول شان ایله اتصاف !..

اوت !.. واردی هریانده بیك بارقه ،

فقط واردی بریانده برخارقه !..

شعاعیله تنویر ایدوب ظلمتی ،

او قادردی ایقاظه بوامتی ..

بونور الویروب فرق نیک و بده ،

گیرلمزدی محبس دیو معبده .

اوگون عقل رونق ویرردی سره ؛

طا پلازدي پارلاق ديو افسره .  
 خرد سوز او بر نور ایدی ذی کمال ؛  
 او بر نور در شمدی ده احتمال .  
 سزالاتناهی بی ایتسه قفس ،  
 ادا وفدا ایتدیگی صوڭ نفس !..  
 کوچو کدر بوملکت ، بو برج و بدن ،  
 مزارنده کی ذره خا کدن !..  
 سن ایتدک او گهساری بر خا کسار ؛  
 دگر دگسه افلا که بوانکسار !..  
 صکرهجه  
 بوگون ملکی یغمایه عزم ایتدیلر ؛  
 بودیوانی صحرای رزم ایتدیلر !..  
 سموم اجلدر بو آنده آسن ؛  
 بوزندان ، بومقتل ، بومدفن ، بوسن !..  
 اولوم صالدک احیایه تعریض خوان ؛  
 یانیلرسین امواته بی استخوان ؟..  
 بن اونلردنم قهره گلدم سنی :  
 بودرسنجه اولملکلرک احسنی !..  
 زنجیر ایله ساردانا پالک اوستنه یورر .

## ساردا ناپال

ساردا ناپال آوازی چہ قدیغی قدر

یقیل !!

باش خادم

آہ ...! اقدام !! نہ اولدی ینہ ؟ ..  
باش خادم وسائر خدامک کلہ سیلہ سنبوت همان کورتیز اولور .

ساردا ناپال

نہ در ؟ .. سز می جان ویرد گز خانه ؟ ..  
دیرلش مصیبت !! بی آوردی باق !!

باش خادم کولہ رک

دگلمیدی قبرندہ پادر رباق ؟ ..

خدمہ دن بردیکری باش خادمہ

— اورلدم — دیور ؛ یارم دن یوق نشان !!  
دہ خارجہ کلہ بانک تہور باشلاو . ساردا ناپال آجی آجی کولور .

ساردا ناپال خارجہ باقہرق

جلوس ایلہ مش لاشہ ، پرشوق و شان :  
باقک !! اشته ہب بیعت ایتمکدہ خلق !!

ساردانا پال

باش خادم سکینت الیه

صنمخانه دن رجعت یتمکده خلق .

ساردانا پال

فرار ایتدی ، مجنونی ییلدیردگز ! ..

باش خادم

فقط ، غالباً سزده چیلدیردگز ! ..

— ❦ —

منظر :

۸

ساردانا پاك سرايى ساده چه مفروش براوطه . برسونوك  
قندیل . مستفرشات . و براختیار قادین که صکره دن کلیر .

مستفر شه لودن بری

ملك شرقی به ..!

بردیکری

هب طویانلر گولر ،

بردیکر دها

بوعادت که زندان نشین کیمسه لر ،  
ترتم قیلارلر اویورکن جهان .

دها بردیکری

خصوصاً اویورکن اوشاه شهان

## بردیگوری

یا پارسه ق نه وار آهدن بز نغم ،  
که اگلنجه اولدی بزه درد و غم !..

## اختیار قادین بوصرده کلرک قلمی

بومهر و لرک اولدینی منله ،  
ضیا پاش برنجیم گریان هله !..  
او کمتر ضیادر که تنویر ایدر ،  
یا قار چهره ظلمی تصویر ایدر ؛  
اولوب هم ده بالایه پرتو فشان ،  
ویرر انتقام خدادن نشان !..  
زمین نیازده  
الهی !.. او یوب کیف مردارینه ،  
صبیلرله زینت ویرن دارینه [\*] ؛  
قیلوب ارضده کسب ایدن اشتهار ،  
هب از هاری حسرتکش نوبهار ؛  
طیوره ویرن نفرت از هاردن ،

[\*] بوراده کی - دار - دار آغاجی معناسنه در . ع . ح .



بوادی به اسحار و انهاردن ؛  
ایدوب قتل عام بشردن نکول ،  
ملکرتی بی ن ازدهای اکول ؛  
ایدوب قزلری وقف برج و بدن ،  
نجومی بیله خنده دن منع ایدن ؛  
اوبی رحم ، اوخائن ، او ظالم یتیر ؛  
عدالت یتشدیر ؛ مظلالم یتیر !..  
بومرده مستقر شلر برقهقهه ایدوب بده آتیده کی شرقیه باشلار .

شرقی

۱

نه در ایتدیگی ظلم وعدوان بزه ؟..  
نه بولدق ویرلدیسه عنوان بزه ؟..  
آجیر بونده اعدا و اخوان بزه !..  
قان ایچمکده بی جنحه گور آدمی ؛  
اونک دائما او یله گچمش دمی .

شرقی

۲

دگل سجن مظلوم بومدهش بنا ،

بوگون بلكه لحد بقادن فنا!..  
فقط شاهه لازم دعا و ثنا .  
قان اچمكده بى جنحه گور آدمى ؛  
اونك دائما اوينه گچمش دى .  
هې بردن رقص ايدرلر . توقف ايديجه :

اختيار قادين

بودت ياره لشمشدى ، بولمش شفا ،  
بر مستقر شه

امينم اونك عمرى ايتمز وفا

برديكرى

اونى بلكه ايلردى احيا اجل ،

برديكرى دها

اولور كور قراكلقده گويا اجل ،

بزي گورميورسه بودر عالى!..

بيوك برقبو آچيلوب اوزاقدن مشعله جي قزلرك آراسنده ساردانا پال كندى  
كوريلور . خوف وسكوت ومعظيم .

اختيار قادين

باقك!.. سز گوروك صاحب دولتى!..

ساردانا پال دوشر کبی اوطوره رق

دیزم ..! قوللرم ..!

مستقر شه لر هب طویلانوب قوللرینی ، دیزینی ، اوموزلرینی اوغغه باشلارلر .

صبح و شام خدا ،

قادینلر یولنده فدا در فدا ..!

ایکلر . مکره دوام ایله :

گوکل صاغسه ده انهدام اوزره تن

که اعمارده امداد کزدر یتن ،

قادینلر دل و جانی احیا ایدر ؛

گلنجه قادین اضطرابم گیدر ،

شفقدن گوزلدر قادین رونما ؛

قادین گورمه یی ایسترم دایما ..!

توققدن مکره

قادیندر تجلی صبح ازل ؛

جهانده قادین وار قادیندن گوزل ،

طیور مشاجر ، ریاح بهار ،

کواکب ، مه و مهر ، لیل و نهار ،

قادینسز اولور هیچی بی صفا ؛

جهانک بوکا عمری ایتمز وفا ..!

چیچکلر قادیندر ، ملککلر قادین ؛  
 دیلردم که اولسون فلکلر قادین ؛  
 فلکلر ده در چونکه تحتم بنم ! .. -  
 یا قشماز یره نجم بختم بنم .

مکوهجه

بومسلکده بن اولشم منتهی ؛  
 قادینسز بو عالم تهی در تهی ! .. -  
 آمان قوللرم ! .. آه ! .. آمان دیزلرم ! ..

اوغوشدی برورلر .

سز اولماز سه کنز ، بونده بن نیلرم ؟ ..  
 گوزللك او برلمعه در دلنشین ؛  
 قادینلق ، او بر خنده در آتشین .  
 ملککلر حیاتک قادینلاشمسی ؛  
 چیچکلر نباتک قادینلاشمسی .

قادیندر جهانگیر ، موجود ایکن  
 قادینده بوزمی قوت شکن ! ..

کندیکنندیه

فقط اونلری بن اُزر ، یوللارم ! ..

جهراً

آمان دیزلرم ! .. آه ! .. آمان قوللرم ! ..

ینه اوغوشدی برورلر .

قادینلر سگیز سز ، گوزلر سگیز ؛  
 نه سویلر سه گیز ، روحه سویلر سگیز .  
 بدایع سگیز بونده ذات الصفات ؛  
 سز گله ایدر حق بزه التفات .  
 خدا ویرمش الحق مزیت سزه ؛ [\*]  
 دنی در ویرنلر اذیت سزه !..  
 سزک صنعگیز در بتون شاعران ؛  
 سزک فیضگیزله اولور خامه ران .  
 بو عریان محاسن ، بوصافی بدن ،  
 دها سود بخشا طورر شعر دن !..  
 سزک علمی صانعدر آلاتگیز ؛  
 برابر طوغار هب کالاتگیز .  
 اولور شیر مد هوش ننجیر گیز ،  
 ایدر عقلی دیوانه زنجیر گیز .  
 دها قهرینه حاضر آلات ایله  
 ذکا صیدینه خاص حالات ایله  
 بومیدانه چیقمش سگیز پر سلاح ؛  
 فقط پر سلاح فلاح و صلاح !..

ع . ح .

[\*] خدادن مقصد بعل اولدینی .

بم سز سگنر الك قوی موکیم ؛  
 سز کله فروزان اولور کوکیم ..!  
 جینم اولوب سجده ساز نیاز ،  
 بولور پیشکزده سزك امتیاز ..!  
 سز انصاف بخش محاکم سگنر ؛  
 حکومتلره قارشى حاکم سگنر ..!  
 نه ایشلر سه گنر سز ، دگلدر گناه ؛  
 گنهکار اولان سزدن، ایستر پناه ..!

کیتدیجه تغیرله

جسور ایسته یوب برهراسانی سز ،  
 شپارتیر سگنر بعضاً انسانی سز ..!  
 شهی گورمک ایستر سگنر برگدا ،  
 سز ایتمش گبی شاه اوئی ابتدا ..!  
 چکلمز دیرم وضع طنناز گنر ؛  
 جهنم اولوگ ..! ألیرر ناز گنر ..!

قولوی وایقاری ایله اطرافنده کی قزلری ایستوب دوشوره رک حدقله کیدر .  
 مشعله جیلر تعقیب ایدرلر . اخقیار قادیله مستقر شهلر قالور .

اختیار قادی

بوگلچهره لر همزمین گیاه ..

بتون رنگر بوندن اولسون سیاه !!  
گورنمز فلک صانکه ایلر حجاب ؛  
کواکب بویوزدن ایدر احتیاج !!  
بو حاله سحائب اولور اشکریز ؛  
صواعقده گویا که مردمگریز !!

یوده کی مستقر شه لره باهراق

سیه لوحه بیك درلو الوان ایچون :  
جهان سختدر ، سخت نسوان ایچون !!  
کیم بن ؟ .. شوقز کیم ؟ .. اوغدار کیم ؟ ..

بر مستقر شه

بو خواب سفالنده بیدار کیم ؟ ..

اختیار قادی

نهیم آه !! .. مجنونییم ؟ .. بن نهیم ؟ ..  
بتون گون او یا نمقده برفتهیم !!

بردیگر مستقر شه

او یا نماز بزم بخت نیامز ،  
که هب لیلدر بونده آیمز !!

بردیگری دها

اویانسه قده ظلمتده یز بی دلیل ؟  
اویانمقدن اگلار می چشم علیل :..





منظر:

۹

سادہ جہ مفروش بر خوابگاہ . یودث یالکز تفکرات ایچندہ .

یودث

جفا دیدہ عشق ، شیدا یودث ،  
پدر دشمنی ، یار اعدا یودث !..  
نہ صاندک مگر سن دہ سلطانی سین ؟ ..

نہ ایشدر بوبادی شرم بنات  
سکا لغت ایتسون دیرم کائنات !..  
خیالتمی سین ؟ .. جن می ، شیطانمی سین ؟ ..

تبدیل طور ایله


هوائیلکم وار بوگون پک ینہ ؛  
گوکل دوشمگی ایستیور پاینہ !..  
باشمدن چکل ، سن نہ افکار سین ؟ ..  
یازق ! .. عاقبت جنگہ بالابتدا ،  
بنی حرص شهرتله ایتدک فدا ؛  
وفاسز سین اما فدا کار سین ! ..

مکرہ جہ

نه اغلار سين اي ديدة بي حيا ! ..  
 وفاسزلغي سنجه مخفي مي يا ؟ ..  
 دگلدك ياسن بريالان شاهدي ! ..  
 بويوزدن گورن سنسين اك چوق زيان ،  
 پدر منخلع ، شاه آثوريان ؟  
 او عاصي ده قلبمده بر شاه ایدی ! ..  
 نه ياپسه م ، الهی ، بو هجرانه بن ؟ ..  
 اوگا عاشقم بك مصّرانه بن ؛  
 بکا يسه او بر خصمدر بعدما ! ..  
 بوگون نيلاهيم حال و مستقبل ،  
 ييقار كن عدو نينواي ، بابلي ؟ ..  
 فقط عاشقم دائما ، دائما ! ..  
 براقدك بني يولده سن بي قرار ،  
 توحشه نزدمدن ايتدك فرار .  
 دوام ايت ، يولكدن چويرم سني ! ..  
 فقط شوندن اولسون كه قلبك امين ،  
 بني خالق آسمان وزمين  
 ياشاندجه اغياره ويرم سني ! ..

حقارت گورنجه محبت گيدر ،  
فقط كينه گلمز غبار كدر .  
نهدر قابلي شمدي بيلم دلن .  
ايچمدن گلن شمدي نفرين وكين ؟..  
اولورمي بو حس مستمر و مكين ؟..  
المدن گليرمي ايچمدن گلن ؟..  
ينه وضع متبدل ايله  
ايچمدن گلن هب محبتدر آه !..  
خصوصت ده گلسه ، اولور سدر اه  
قيرلمش سلاحيه سردار عشق !..  
الهي !.. او اندام بالا نه در ؟..  
اوپيشاني ذی تجلا نه در ؟..  
نهدن بندن اولماز خبردار عشق ؟..  
ايدرسه ن او نى سن نصيب آخره ،  
بن اولمازمي يم بونده بر مسخره ،  
تماشا گر انهزام اميد ؟..  
اميده ممت ايتمه ده فتح باب ؛  
اودر عمت زندگي شباب ؛  
نصل قيلمه يم التزام اميد ؟..  
توقفدن صكره

ڀڻه ڇاڄلا پور جوڀي عمر م ، نه سوڊ ؟ ..  
 ڊگزلرله سوئمز بوشمع حسود ،  
 جڀئمڊن اولمش گڀي مشعل  
 ڊگلڊر ، آقڀن برخوش افسانه يأس ؛  
 جسارت ويرر بعضاً انسانه يأس ؛  
 خطرنا ڪڊر عشق منفعل ! ..  
 نه ياماز بوهجران ، بوسوز جگر ،  
 حسدله برابر اولورسه اگر ،  
 گوروب ياري بر بشقه همسرله يار ؟ ..  
 آقڀن ! .. بيل ڪه ياعمر من مشترك ،  
 ويا قبر من توأم اولق گرك ؛  
 بنڀي صاي بومقصده بنڀي اختيار .  
 اولورسين ، گلير بر زمان ، معترف  
 ڪه عز منڊن اولماز يودث منحرف ،  
 ڪه خوننده واردر اصالت هنوز .  
 فقط شڪر و حمد ايت ڪه خلاقڳه ،  
 الهڀ گوزڳ حسن اخلاقڳه  
 خيالڊه ايلر دلالت هنوز .



منظر :

۱۰

نینوا شهرینک خارج سوری . محاصرین طرفنده آقین دارا کسک  
خیمه سی . اوچ سنه صکره . آقین دارا کس ایله نیناس مصاحبته .

### آقین دارا کس

اوت ، عون باری ، مساعی ناس  
بزی مظهر نصرت ایتدی نیناس .  
فقط ساردانا پالده - زوهرات - ایله  
اولوب بر ، بزی ازدی کرات ایله .

### نیناس

فقط اولدی جیشتمده دهشت عیان ،  
کچنجه بزه فرقه - بلخیان - .

### آقین دارا کس

گوروب قلعه ده اختفای بجا ،  
لعین ایتمیور شمدیلک التجا .

نیناس

اوت، یاور اولمغله قدرت بزه ،  
اگرچه نصیب اولدی نصرت بزه ؛  
هنوز ایتیمور جیش منصور سور !!

آقین دارا کس

بز ایتدک اونى گرچه محصور سور ؛  
اویتدی بزی بویله صحرا گزین .  
نه صحرا که دریا اولور بعدازین !! [\*]

نیناس اوکسوره رک

حقیقت یمان بر قیش اولدی بویاز !!

آقین دارا کس

بوگون طاغ طاش ایتمکده صلحی نیاز ،  
نصل صلحی بکلمسه مرغ و نبات ؛  
عناده ایتمکده خائن نبات !!

[\*] یغمورلرک بولانی مراددرکه تاریخاً مریدر . ع . ح .

نڀناس

ٻوڻ غمور ڪه ڦيل مقدده اجرائي سيل ،

همان هرياني ايتدي مجرائي سيل !!

بتون گيردي قوشلر بالق شڪنه ؛

ڪولڊ ڪڏن هڪره

ڪه مألوف ايڊڪ بر زمان اڪنه .

نه تمساح ايمش ايله پور امتزاج ،

بوطوفانله اول آفت زن مزاج !!

ايڪيسي ده ڪولڊ ڪڏن هڪره

فقط بڪليور ياري آغوش يار !!

آقين دارا ڪس

اوياروطن ، بن غريب الديار .

نڀنا

آچي قدر سکا بنجه باب اميد .

آقين دارا ڪس

بوطوفانده سوندي حباب اميد .

سکا قلبي ايتدمي ڪشاد ،

ڪه نوميدم اولمقدن آتيده شاد ؟ !!

که مغلوب و غالب ده اولسه ق بوگون ،  
 بوغوغانی تعقیب قیلماز دوگون .  
 اوظام که بیلدی نه در انهزام ،  
 بوگون اولمکی ایلمش التزام ؛  
 دیم شهر ی تسلیم ایدرده گیدر ،  
 اولیرده اونی اویله تسلیم ایدر .  
 او هنگامه ده صاغ قالور می نگار ؟..  
 قالور بلکه دهشتلی بریادگار !..  
 اوت نجم امیدم اول مهلقا ،  
 چه قبری مغرب قیلار مطلقا ،  
 که گوز یاشلرمله لبالب قالور !..  
 او حالده بنمچون نه مطلب قالور ؟..

### نیناس

بوگون بش ییل اولدی ، بن ایتدم حساب ،  
 که ایتدک او سلطانه سن انتساب .  
 اوت ، ناله خیز کدر ، اشکریز ،  
 بو اقلیمه بابلدن ایتدک گریز ؛  
 گورشدک اونکله چنزارده ،



که بولش ایدک حالت زارده ،  
که هر دم تحسرله گویا ایش ؛  
سنگله فراره مهیا ایش .  
اولور کن بوکا میلی ، یارخصتی ،  
قاچرمق نیچون او یله بر فرصتی :  
نه دن ایتدک سودیگکله فرار ؟ ..  
نیچون دوندک اونسز ؟ ..

### آقین دارا کس

مع الاضطرار .

شوا قارار مقده بولنور .

ستمله براقدمسه بن دلبری ؛  
وطن خدمتدن دگلدیم بری .  
اگر بریودت قالماش اولسه زار ،  
وطنده یودت وار هزاران هزار ؛  
که اونلر اولوردی بوگون ناله زن  
سکرهجه

سهوینمکله قانماز بویولده گزن ؛  
سهویندیرمه دن حظ ایدر خلقتی ؛

اونك خلق اولور جالب د قتی .  
 نه صاندك حیات او یله آسانمی یا ؟ ..  
 کدر گورمه یں آدم انسانمی یا ؟ ..  
 حظوظه صاقین حصر نفس ایله ،  
 که هب ذوق ایچون گلمدک عالمه .  
 عمومی سهویندیرمک اوزره کدر  
 بنی گلسون ایتسون بوگون در بدر .  
 کشی کندینی سودیرر یارینه ؟  
 مهارت یارانمقدر اغیارینه .  
 و برده جهان حالی در بو ، نیناس ،  
 دگل سین یاسن بر جهان ناشناس ،  
 فصل اولسون آدم همان بر مراد ؟ ..  
 زمان خوش گچرمی علی الاطراد ؟ ..  
 ثبات اوزره اولسونمی جان شادمان ،  
 که ثابت دگلدر زمین وزمان .  
 اورتهلق کیتدیکه قاراور .  
 فدای وطن ایله نم یاره بن ؟  
 فقط یاری ده ویرم اغیاره بن ! ..

نیماس

زواله تقرّبه ذات الجمال ،

سنک اشتیاقک ینه برکال .

آقین دارا کس لطیفه طرزنده

دگل هب جدله صلابت نما ،

هوامزده ده ثابتز دایما .

نباتی کوچوک ایشده قیل اعتیاد ؛

ایدرسین اوئی سن بیوک ایشده یاد .

نه وار سنّا ایتمشه آز چوق شتاب ؛

که آرتدقّه تابان اولور ماهتاب .

بردن بره یاغور ، ییلدیرم

نیماس لطیفه ایله

بزم باشلادی اشته مهتابمز !!

آقین دارا کس غرور ایله

کسلمز بوشبتاب ایله تابمز !!

نیناس

گر کدر بوجیش گنهکاره شو

آقان سیل رحمتله بر شست وشو !!

بوآرهلوق بلیس ، اربا کس ، عبدالبعل وسائره ، ایصالامش حالده  
برد برر کلیرلر .

بلیس

بوارضه نه دن بویله طارغین سما ؟ ..

آربا کس

نه عصیان آتش !! نه طغیان ما !!

هجوم ایتمه دن غیری بن عاجزم ...

عبدالبعل

بو طوفان دینیر ، صگره نوبت بزم !!

ولو یامش اولسون قلاع وبروج ؛

عزیمتله ایتدک وطندن خروج .

بلیس

خبر یوللامش دون اوشاه عنود

- که بیهوده در بونده محو جنود ؛

که حصر ایتسه گز شهری سز حشره دک ،  
بنی آله ایتمز نه قووت ، نه دک ؛  
جهنم اولک که ، گلنجه بهار ،  
گورنمز اولور سزجه لیل ونهار !...  
بیورمش !..

عبدالبعل

هجوم ایتلی شمیدن !..

نیناس

بویولده براوچ ییل دها گچمه دن !..

عبدالبعل داراکسه باقرق، اورته نه

تفکرده برعاشق دلفکار !..

یارین حریدن صگره باشلار شکار

که بیک حربه فائق اهمیه ،

بنمدر اوحیاً ویا میتا !..

داراکس اورپرر .

نیناس

امیرالعرب ده براز منفعل ؛

نگاهنده بر راز دل مشتعل !..

استهزا ایدر .

عبدالبعل

دروغ دیمکدر او آتش نثار :

یا احراز مقصد و یا اخذ ثار !..

آقین دارا کس

بود عوایی آتی ایدر فصل و حل .

عبدالبعل

اوزاق گیتمکه بلکه قالماز محل !..

آقین دارا کس

سپهر و عربله ملک همجهاز !..

بومکنسه قیل فرصتی اتهاز ...

بلیس سوزی کسهرک

صوص او غلم !.. بوبحشک دگلدر یری .

غخیر براقق ایشک اخیری .

گور رسه اگر جائز ام النجوم ،

بوشب ايلرز شهره بر صوڪ هجوم .

آقین دارا کسیدن بشقه هپسی کیدر لر - یالکز عبدالبعل کیدر کن  
طوروب خشم ایله آقین دارا کسه باقار . آقین ده بونظر خصانه بی اعاده ایدر .

عبدالبعل

عربسه م سیهرو بیلنمک ییچون ؟ ..

ویا آبرویم سیلنمک ییچور ؟ ..

قرا گلقدده در هب سنین وشهور ؟ ..

شفق لیل اسوددن ایلر ظهور ! ..

سریعاً کیدر . آقین دارا کس یالکز قالیر . شدتلی روز کار .

آقین دارا کس خیمه سنده

قلیج لر - بولوتلر بوارق فشان ،

اولور کن هب آفاق اولومدن نشان ؟

شناور یم آتش وخونده تن ،

صفر عدمکن دمام او تن ؟

خیالده دیدار دلسوز یار ،

قالوردم تحسّره بی اختیار

فقط - حیّ ومیت - بومهلك خبر ،

هب آمالمی ایتدی زیر وزبر ! ..

بردن بره زانو نه زمین تضرع واسترحام اولور . فورطنه دائم

الاهی ، بیوکسین ، بیوکات سنک !.. [۱]  
 عوالمده مملوک و مالک سنک !..  
 خداوندسین ، دیر ، سما وزمین ؛  
 خداوندسین ، خالق عالین !..  
 بنم قولدن اولسونمی خوف ورجام ؟..  
 ید قدرتکدن کیم آلمش لجام :..  
 سنک امر و نهیکله قائم بودهر ؛  
 طورر گوه و صحرا ، یورر ابر و نهر .  
 سکا واصل اولمقده هر بر طریق ؛  
 وجود کده در دشت و دریا غریق !..  
 قدر دست حکم کده احکامبر ؛  
 قضا پای قهر کده زیر وزیر !..  
 ازل ملک صنع کده بر کهنه باب ؛  
 ابد بحر ذات کده کمتر حباب !..  
 هب اشیاده جمعیت وحدتک ،  
 هب اجزاده کلیت عادتک !..  
 سنک آتشکله دوزر کائنات ؛

[۱] آقین دارا کسک بومناجاتنده تألیه ایندیکی - بعل - نام

معبوددر .

ع . ح . ۰



بوگون امر ایدرسه سونر کائنات ؛  
چیقار فرع ناچیزدن بیك اصول ،  
گچر آن واحده برچوق فصول ..!

اورته لقه باقرق

نه ترتیب در بونه تنظیمدر ،  
عنصر که شایان تعظیمدر ..!  
نه دیهیمدر بونه داراآدر ،  
عوالم که همجرم ذراآدر ..!

اصوات بلند . های هوی جنود . رعد و برق . صرصر .

نه احکامدر نازل اجراآدن ؛  
اوادوار بی مکث و آرامدن ..!  
کواکب سنک مهر که مشرقه ؛  
مواکب سنک فیض که بدرقه ..!  
سنک چون ثواب ایشلر اهل صلاح ؛  
کنه کارلر سندن ایستر فلاح .  
قیلوب آهلیر نزد که اعتلا ،  
دوشر سافله عین برق بلا ..!  
سنک معکسک چاهلر ، او جلر .  
سن الله سین دیر طوروب موجلر ..!  
الوهیت کدن عیان جسم و جان ،

ربوبيتگدن نشان این و آن !!  
 گوزل جمله نقش وندارک سنک ؛  
 گوزللك ده بریادگارک سنک !!  
 - یاحی و یامیت - یاخیر و یاشر !!  
 اوت ، حی و میت ، قولگدر بشر !!  
 او جانانه قسمت دگاسه وصول ،  
 مرادم بنم سنده بولسون حصول !!

اسمکده اولان مرصرك برضربه سیله یوصره ده خیمه یارچه لانه رق اوچار.  
 محاصرین اردو سنک سیلور، ییلدی رملر آره سنده نینوا قلمه لرینه هجوم ایتدکاری  
 کوردیلور. آغاچلار هب رکوع حالند، وییلدیرم ضیا سندن یغمور دانه لری  
 آتشدن سچیمار شکلنده نمایان اولور ، چادرك اوچه سیله یومناظر میدانه  
 چیه رق آفین دارا کس تحفظ سائقه طبیعی سیله بریوک آغاچه التجا و او آغاچه  
 برابر سجده ایدر کبی ندا ایدر :

بوطوفان نه ، یارب !! بود هشت نه ذر ؟  
 بوخونریزلکلر ، بو وحشت نه ذر ؟  
 نه ذر قوشما من موته امداد ایچون ،  
 بو بیداد یکدیگره داد ایچون ؟  
 یازقدر بواقوامه ، ای ذوالجلال !!  
 یتراختلاف ، الویرر اختلال !!  
 شو آشوبه الطافکی شامل ایت ؛  
 شو وحشیلری آدم ایت ، کامل ایت !!

سوررسه بوجنك ، آدميت بتر ؛  
 دم آشتي گلسون ، آرتق يتر !..  
 يا انسانلره جوهر احسان بيور ،  
 وياخود نبي يرله يكسان بيور !..  
 معيشت ديورلر ، معيشت بومي ؟..  
 حياتك يوزنده بشاشت بومي ؟..  
 صيقلدم بورؤياي تعيردن ؛  
 بوغندي اولان راي وتديردن .  
 اويان ، پنجساله شب فتنه زا !..  
 بو آتش ، بوسرماي مردمگزا ،  
 بو محشر ، بومدهش تماشا ندر ؟..  
 بوقرياد فرياد بخشا ندر ؟..  
 بو عالم كه اغراض حساد ايله ،  
 طولار بطني هر لحظه اجساد ايله ،  
 كه دونمكده در مست خون جگر ؛  
 دوشوب خيره سر ، صيرسه آرتق دگر !..  
 صواعق فشانكن بتون اختران ،  
 سن آتي ميسين ، اي شب بي گران !..  
 كه هيچ طويميور بونلري ظلمتاك ؟

مزاری میسین یوقسه بوامتک ؟..

ییلدیرماره باقرق

أس ، ای باد ، أس ای ضرصر زورگار ،

شومشعلری سوندور ، ای روزگار !..

لقای عدمدن شوبیك قات بتر

سپپرده جهلی چاك ایت ، یتر !..

طاغلسون بولیل ونهار دمار ،

بودوددم آلودی قیل تارمار !.. [\*]

زیادهجه اکیلن آغاجه

نهدر ، ای شجر ، ایتدیگم اشتکا ؟..

سکا همده قیلقدیم اتکا ،

تحفظ ایچون باد پرزوردن !..

یا عاری میسین سن اومخوردن ؟..

سنكده یاقار جانگی زمهریر ،

بوکر قدگی تند باد شیریر ؛


زمین تضرّ عده صبح و مسا

اولورسین بو آلق گبی سجده سا !..

تبدیل وضع ایله

[\*] - دم - خون - معناسنه . ع . ح .

دارا کس !.. یترا ، فرصتی قیلمه فوت ؛  
گور نمکده قارشو گده بیٹ درلو موت ؛  
گیدوب ایله اک تندینی انتخاب ؛  
بوکابوس نفسه قیل القای خواب !..  
سل صلاح ایله مهاجین اردوسنه قاتیلن اوزره متهالکا کیدر .



منظر :

۱۱

نینه‌اده ساردانایالک سرائی . طولانی پراوطه . ستفنده کی پنجره لردن  
شمشکر عکس ایدر . یغمور محسوس ، رعد مسموع ، اصوات مختلفه منعکس .  
اورته ده غایت مرتفع وجسیم وصللی بر سریر . ساردانایال . یودث .  
مستفوشه لر . ودها کوچوک کریه لر . خادم و خادمه لر . و صکره بتون  
سرائی خلقی .

## ساردانایال

فلک بویله تغیری قیلمش مراد .  
آنک هانگی حالنده وار اطراد ؟ .. [\*]  
مهانه تحکم قیلنجه کهان ،  
بوزولش دیمکدر نظام جهان .  
قیلچ نیله سون قول اولنجه سقیم ؟ ..  
سرایمده ، نسلمده دشمن مقیم ! ..  
سلمدن سریره چیتوب آراده ستفک یان پنجره ستدن بانه رق  
امان یوق چکلد کسه ده مأمنه ؛  
سماویلر آچمقده یول دشمنه ! ..  
برآرده لق شمشکر کیلوب صباح اولمقده اولدینی ضیای منعکسدن آکلاشینور .  
[\*] اونک یرینه آنک .  
ع . ح .

## ساردانا پال

اوت ، خصم اولدی اودا بتون ؛

اهالی طرفگیر اعدا بتون !!

توکندی مهمات وارزاقز ؛

مدد ایله من اولدی رزاقز !!

خارجه بانهرق

بات ، ای آفتاب سیمچهره ، بات !!

سکا ، بن گوچرکن ، یاقشماز ثبات !!

سقوط ایت ، اولوب بریوک ییلدیرم ،

طوتوب بن سنی ، خصمی یالوارتیرم !! -

یاقلسون ، یقلسون قلاع و حصون !!

مصوندر بنم تحتم البت مصون .

گلیرکن ، بیلک ، ای بلیس - اربا کس ،

که بولماز سگزر بونده صاغ برمکس !!

ایچرده کیلره

نیچون خاک اوله خاکپای خدم ،

کول اولمقده ذاتم بولورکن قدم ؟ ..

اولیرسه اولور جان وتن بی نشان ،

فقط صاغ قالور تا ابد نام و شان !!

دیشارده کیلره

## ساردانا پال

بو اقلیم معروض تسلیم در ؟

وجود مله قائم بر اقلیم در !!

دعا شدید

قابانسون مساکن ، معابر بزه ؟

آجلمازمی صاندک مقابر بزه ؟

جهنمه گلسم بوگون رو برو ،

یانار خصمه ایتم فقط سرفرو !!

ینه ایچرده کیلره

اوچوب نسلم اولسون سایه نثار ،

فلکدن قانمش اولور اخذنار !!

اوت جنک ، مملوک و مالکله جنک ؟

معابد ، مصائب ، مهالکله جنک !!

اولوب مملکت بریوک مقبره ،

آچلسون خدا سیله پیغمبره !! [\*]

خارجه بانه رق

گیرک شهره !! آنجق بن ایتم رجوع .

اتهنرا ایله

هب ارزاقز بیتدی ، هر کسده جوع ؟

[\*] بوراده - خدا - دیدیکی - بعل در . واونک پیامبری

بلوسدر ، یا کلش آکلاشلمسون . بلوس ساشانک جد اولینی در .

ع . ح .



## ساردانا پال

صنملرده باقی فقط اشتها !!

ییسونلر نه من وارسه غالیما !!

خدمه یه

مماثل نه وارسه زرو جوهره ،

یغلسون بو هیئت نما مشهره !!

خدمه دن برقاچی چیقار .

بنا ایله یم بر جهان عبر !!

ینه آمرانه

بتون قابعاته ویرلسون خبر !!

برقاچی خدمه دها چیقار .  
خارجه

گلک سز هب انصار واعوان ایله ؛

گلک ، چارپشک شاه نسوان ایله !! [\*]

تاظه سنه

سز لئده چیقار عرشه اوصافکز .

## یودث

اولور می بوکا قائل انصافکز ؟

ینه قارا کلی چوکر . بوارق باشلار .

[\*] یاخود - جیش نسوان ایله . ع . ح .

## سارداناپال

صنملىرى سىزى ناره ياقىق دىلر ؟  
بىز جىنجه مىز ؟..

## سارداناپال خاوجە باقىرىق

نىنوايە گىردىلر !..

سارداناپال

شوو ار كە بودىوانە گىرمك محال !..  
مستغرىش لىرى دىكرىنە  
نەدر مقصدى ؟..

## سارداناپال ايشەك

قورتولشدر بو حال .

## يودىث

نەدن آتم اولسون فقط برصى ؟..

## سارداناپال

دىگلىمى اوزاتما سىقت برصى ،

ساراپا خطا عشق گىزىشە مىرام ؟..

سارىندىن ايندىكى صرەدە سىغىلارك بىرىندىن صاعقە تىزول ايدىر . بىراق  
قادىن اورولۇرە بىرچوقلىرى پەت وخوف ايله دوشىر . سىرىك دىنى بىرغىرى ياناز .  
سارداناپال اصلا فقور كىتورىمىوب حدت وشىتتى آر تىزىر ، كولهرك واصابت  
ايدىن يىلدىرى مىراد ايدىرك بىر كىنارده مېهوت طوران يودىثە خطاب ايله :

قوجا قلاش يودث ، اشته طفل غرام ..!

عمومه توجهله

گيدرکن بوگون عزم ايله بريکا ، [\*]

بيلک ييلديرملر يتشمز بگا ..!

قلبي

فلک ياقمه دن بز سونرسه ک دگر .

بيوش ياتان قاديلردن برقاچنى تىکمه سيله اوروب يوقلايه رق

گبرمش مى بونلر نه اولمش مگر ..!

حايقره رق

يتر قاله کز هي !....

ساردانا پالک انعکاس دوتشدن مهتز اولمشجه سته هر طرف تزلزل ايدوب

نهايت ديوانک برطرفى ييقه رق غايت بيوک برطاش دوشر .

## يودث

بو بر منجنیک !..

بو طاش کوچوک چوجوقلردن بريسى ازرا وديوارى يتشمز اولديقندن  
رخسهرلردن خارجه يانغين ايله قلعهرلرک يقلديقى وهواده پاچاوره ، قونداق  
وقلاص ومنجنیک طاشلرله اوق وچريلرک اوچديقى وبرچنردىکى عساکرک  
آره صره قاچدينى ودوشديکى والاصل هنيمتک تعمم ايتديکى کوريلور؛ فرياد  
وغريو ايله باران وبواق دوام ايدوب کيجه ايله کوندوز بربرينه قارميشور .  
حضار کندولرني غائب ايتشمز کي اولوب کيمي دوشمکده ، کيميسى ده يکديکرىنه  
دارلمقده ويالکيز ساردانا پال دنا زياده کسب شدت وحدت ايدرک اوتيه برى به  
قوشه رق ، برطرفندنه ياپديغى پيامهرک صويونمقده بولنور وبرآراق يودثه  
خطاب ايله منجنیکى اشارت ايدرک :

[\*] - بريکا - بريانه - يرينه . ع . ح .

## ساردانا پال

بو بر حامل مژده ، ساعی نيك ؛  
آقین دن گتیرمشی صور بر پیام ..!

## یودث

خایر ، ظلم علینده ایتمش قیام ..!  
اوبر سنك لغت ..! تحاشی ایدك ...

## ساردانا پال ازین چو جنی آله آله

— نه دن آتم اولسون صیلر؟ ..— دیدك ؛

سیول بلانك شو بر منصی :

بومعصومه آتم می ، بیکس صبی ؟ ..

بیم وارمی دخیلم بواهلا کده ؟ ..

هانی رحمت اصنام وافلا کده ؟ ..

چو جنی یره آتوب چلدیرمش کبی طولاشه رق

شفق می ، گلستان می بومشجره ؟ ..

یقیلان دیواری مراد ایدرك

تماشا ایدك ..! اشته بر پنجره ..!

نه منظر ..! نه خوش لمعه التفات !


بتون کائنات ایله مکده وفات ..!

قهقهه ایدر .

خنجرینی چکوب کوکسنه طوغری کوتور، رك

بئمله برابر دگل ، هایدی گیت ؟..  
قدومنده گورسون سنی اول یگیت !..

متعاقباً مشعله‌یی آتوب ویودئی بلنسدن طوتوب قالدیره‌رق ییقیلوب‌ده  
آچلمش اولان جهتدن خارجه آتہ‌جق اولدیقنده که سمرایی هر طرفدن ناروینخار  
قابلامش وچیمقلار ایسه آرتغہ باشلامش بولنور ، کیم اولدینی یللی اولمیان  
برشخصک آن‌واحدده سارداناپالک‌الندن یودئی قاپوب کوتوردیکی منظور اولور.



منظر :

۱۲

برطرفه طاغردن سایلر آقوب طاشلر ، آغاچلر یوړلاتور ؛ سورلر  
یقیلور . شهره متصل عسکر کیور ؛ شمشک ، ییلدیرم ؛ اوزاقده ساردانایالک  
مراپی یاناز ؛ دیگر طرفه برجیم . ماهره ؛ مدخلنده آقین داراکس ایله  
بودت ، تلاش واضطراب ایچنده صکره عبدالهیل ؛ ودها صکره یرقاج نفر .

بودت پرشدت

حیا ایت ، داراکس !.. اوکمدن چکل !..

آقین داراکس

بودت ، گندگه گل !.. بورؤیا دگل .

بودت

جهنمده اولسون گورنمه بگا !..  
گوزمدن چکل !..

آقین داراکس

بن نه یاپدم سگا ؟..

یودث

نہ یاپدک؟ .. نہ یاپدک؟ .. بتیردک بنی! ..

آقینک اوستہ یوروپہرک

نیچون قورتاروب دە گتیردک بنی؟ ..

سرای کوستہرک

نہدر شوندہ باق برطوتوشمش بنا! ..

آقین دارا کس

بنای مظالم غریق فنا! .. [\*]

یودث دائما سرای کوستہرک

علولر قوشامش شوینیادہ باق! ..

آقین دارا کس کذلک سرای کوستہرک

جزا یوقی غدارہ دنیادہ باق! ..

صکرہجہ

گوروب عبرت آل ، باق دە قیل اعتماد :

اولور جان یاقانلر سراپا رماد ! ..

یودث

بتون عالمہم آندہ نالش گنان ؛

ع . ح .

[\*] غریق فنا ، یاخود قرین فنا .

## ساردانا پال

اویانغینده مستقیم در یانان !!  
یا قارشومده اولماز می سین شرمسار ؟ ..

آقین دارا کس  
سکا شدی آنجق بنم غمکسار .

## یودث

یانان خانه مک غرق خاکستری ،  
نه جراتله چیقْدک بکا مشتری ..  
قائمله بویانمش سرک ، بسترک !!  
اولور می بنمکیله براخترک !!  
بکا غیری برقالدیر مدر دوشن !!  
اواختر دگل ، یلدر مدر دوشن !!  
سنی سودیگمندن ملول وحزین ،  
دوشونمک بیله ایسته مم بعدازین !!  
أوت ، ایسته مم غیری گون گورمگی ؛  
سورونمکدن ائقل عمر سورمگی !! [\*]  
نصل بکلرم ، ایتمه دن بن حیا ،

---

[\*] - عمر - نثرده مستعمل اولدنی کی تلفظ ایدلمکده بأس

ع . ح . ۰

کورلدی .



يانان قومك آتشدن ضيا ؟..  
 الكدن سنك قورتولورسهم اگر ،  
 زبانی یه ، عفريتہ قاچسهم دگر !..  
 دگل رابط قلب ، آل ويررسهم سکا ،  
 شویر ، گولک بوگون لعنت ایلر بکا !..

یو دث بردن بره طوروب مملکتہ ، سرائہ . حرب و حربہ : مسکوده  
 اقراط کدر حالتده طوران آقین داراکسه عطف نظر حنت اثر ایتمکله برابر  
 باندفاعات او-تنه یوردیکی یار دشمن رفتاری قوشوب دراغوش ایدرک :

آقین نرددسین ؟ .. آد .. آقین ! .. آد .. آقین !..  
 بعده دهشتله کری چکلرک

نومکن !..

بوصردده عبدالبعل ظهرو ایتمکله  
 آقین ! .. استه سن گل یقین !..  
 کندیده کلرک

بعل ! .. گل بکا یارسین سن قدیم ؛  
 بابام قیلدی الهام ، اولورکن عدیم !..

عبدالبعلاک اوکتمده کاه تعود : کاه قیام ایدرک ورعشلهز ایچنده اولان  
 آقین داراکسی کو-تدروک ،

خی قورتاران گوردیگک پنجه دن  
 خی قورتاروب حفظ ایت اشکنجه دن !..  
 اولومدن اگر ایله دمسه فرار ،  
 سکا ایتدم ، ای دیو ! .. بن اغترار .

فدا اولسون ، انصاف ایدوب باق بگا ،  
 سراپای جسم حقیرم سگا !!  
 دل و جان تجلی گوزلر سنک ؛  
 بوصاچلر ، بواللر ، بوگوزلر سنک !!  
 سگا قوشدم ، اولمغله ظاهر لهیب ،  
 سنی چونکه بولدم بن اوندن مهیب !!  
 دیز اوستنه یوروپلرک عبدالملک تقریب ایتدیکجه عبدالملک کری چکورو.  
 سنکله قارا طوپراق اولسون یرم ؛  
 آلکله بگا طاش ویررسهن یرم !!  
 سگا قالمه در مقصدم تاابد ،  
 بیابانده بی غصه نیک وید !!  
 که ذاتاً بیابانه دوندی وطن !!  
 کوزی یانقده اولان شهره معطوف اولارق بردن بره قیام ایله ؛  
 جهنم علولندی ، سوندی وطن !!  
 برآقین داراکسه ، برعبدالملک ، برده یانقینه باقدیرمهکره نه سویله دهکنی  
 بیلمز برحالده هوایه خطاب ایدرک ؛

یارین نینوا برباغ اولور دلنشین ،  
 گولرین گولر ، ای لقای خشین !!  
 ینه عبدالملکله توجیهله حریق کویستردرک  
 شودهشتدن افزون ایکن دهشتک ،  
 یودشدن نه در خشیت ووحشتک !!

## سارداناپال

ویرر دهره بر بشقه دهشت دها ،  
 سارل گل ، بوت مساحه ، ای اژدها ..  
 ینه زانو بر زمین خضوع عبدالبعله طوغری رجوع ایله  
 نوشونم بوگون شرایله خیری بن .  
 زهردن شفا بکلم غیر بن . [\*]  
 نه وار آریلور سه جهانندن اگر ،  
 سنکله قاوشمق جهانلر دگر ؛  
 صوکی عین اصلاح وار شاد اولور .  
 دها تقریله

امین اول که روح وطن شاد اولور ؛  
 سنالره آلقشلا ر اقوام ، ام ؛  
 سن آغوشکه آل بنی !..

## عبدالبعل

کندیسی قوجانلایان یودنی شدتله رد ایدرک برصدای رعد ادا ایله ،

ایسته مم !..

یودت یره دوشر ، بعل حدت و نذرت ، آقین ضحیرت ایله کری  
 چنلوب اوچی ده اولدقلری یرده طوکش کبی برمدت قالورلر . بوتقطه ده سکوت  
 عثم ، نقاط سائرده حرب و حریق ، و قریاد و قفان و طوفان دائم . براز صکره  
 عبدالبعل برقچ کره یودنی متفرانه طواف ایدر . دها صکره ،

[\*] یاخود - شفا زهردن بکلم غیر بن - ع . ح .

نه ظن ايله دك سن بنی ، ای قادی ن! ..  
 - اونو تدم ، یودث میدی بیلمم آدك -  
 بنی سن وطنسزمی ظن ايله دك ؟ ..

آقین دارا کس

گور ، ای ابتلای وطن نیله دك ! ..  
 وظیفه مدی آمالمك رهبری ؛  
 الله مگر آچشم مقبری ! ..  
 نه یابدم بن ، ای رب عزت پناه ؟ ..  
 حمیت صانوب ایشله دمی گناه ؟ ..  
 بومیدی بنم عهدده مه ماوجب ،  
 شریعتی در طوتدیغم یول عجب ؟ ..  
 انیسمدی ذات الوفا بربری

که اوستمه دیتردی بال وبری ؛  
 صیانتدی مقصودی ، انجام کار ،  
 اومونس بری بی بن ایتدم شکار ! ..

عبدالبعله ویودنه برنظردن سکره دوشونور . خارجه پانازه ماہم کی بفتة :

اولونجه قدر جان بوتندن جدا ،  
 وطن عشقنه هرشی اولسون فدا ! ..

مائل تباعد اولور .

## سارداناپال

یودث نیم قیام ایله

وطن قالدیمی ، پر مظلوم وطن ؟ ..  
بنم ، ایشته گل ، باق بو حالم وطن ؟ ..  
اوده بویله بی بخت ، بی کس ، خراب :  
بوگون بر حرارت ، یارین بر تراب ! .. [\*]

آقینک اوزاقلادینی جهتی کوستره رک ،

بوگون بن بو عاصی یه عصیان ایچون ؟

شهری مراد ایدرک ،

شو آفتلره قارشو ، نسیان ایچون ،

سزادر سرم اولسه محروم هوش ،

عظام تنم هممغان و حوش ! ..

دیوانجه اطرافه سکیده رک و حایق ره رق ،

آقین ! .. زرده سین ؟ .. زرده سین ؟ .. ای پدر ! ..

کسندیسی یانان سرایده ظن ایدرک ،

هب ابواب مسدود ، بن در بدر ! ..

آقینی طوته رق ،

آقین ! .. بنجه سنسز نه ممکن قرار ! ..

آقین ! .. سندن ایتکده ایم بن فرار ،

[\*] حرارتدن مرام اوئاناده کی حریق . ع . ح .

## ساردا ناپال

سکا اولق اوزره قریباً یقین!..

آقین دارا کسی براقوب قوشه رق برطرفه شتاب ایله غائب و غائبده سیدی  
کیتمکجه غائب اوله رق،

آقین!.. آه، آقین!.. ای آقین!.. واه آقین!..

عبدالبعل

نه وار ایله دمه فدا ی جمال؟..

کالم، یتر، اولماسون پایمال!..

نه سمته آتار سه بوسیل بلا،

دوشوب، ایلرم آنده بن اعتلا!..

بعلده برطرفه کیتمکله موقع یعنی صحنه برمدت بوش قالور.

آقین دارا کس عودتله

کچید یوق؛ علو قابلامش هریری!..

عبدالبعل کذاک دونه رک

برابر اولور سه ق مقهریری!..

آقین دارا کس متحزون

بیوکسین، بگا اولمه سن منفعل؛

قوجا قلاش رقیبکله، عبدالبعل!..

یکدیگرینی دراغوش ایدرلر.

عبدالبعل

تجلیٰ بجتم دیمک بہترین ،  
بومسلکدہ اولمق سکا بن قرین !!  
بوصرہ دہ یرقاج نفر یوڈک نعشی کتیرلر .

نفرلردن بریسی

بویکدر دیوب یار واغیاردن ،  
شوقز کندینی آتدی بریاررن !!

آقین ابلا بعل ایکیسی بون

یوڈث !!

نفرلر نعشی یرہ وضع ایدرلر .

آقین دارا کس

ای بعل !! ای بعل .. چارہ بول !!

عبدالبعل

اونی شمدی باق ایلم بن قبول !!

یوڈک نعشی اقامہ ایدوب قوجاقلایه رق

یوڈث !! خالقک روح ایدینسون سنی !!

الاهات تألیہه اینسون سنی !!

آقین دارا کس کذک جسدی آیاقدہ د راغوش ایدرک ،

براق !.. اوچسون ، افلا کہ اوچسون ملک !..

پرسیتده ارضی گورسون فلک !..

میتہنی ایکسیسده براز ایاقده طوردیروب رقت و حیرتہ تماشا ایتدکدن  
سکرہ نفرات ایله برابر مغزده برکنارہ وضع ایدرلر . آتش کیتدکجه یاقلاشور .  
آقین دارا کس قوشه رق کیدوب برمدت غائب اولور . تلاش و هراس ایله  
برنقو کلیر .

کلن نفر وعشه لرله

جهنم تقرّبدہ !.. یوق برمفر !..

آقین دارا کس

اوستی باشی یاتارق کلوب یوڈه طوغری شتاب ایله

مفرّم بنم اشته ، آه ای نفر !..

بخارونار مستوی اولور . نفرات فراز ایدرلر .

آقین دارا کس یوڈک نهشی اوستنده

جهنم بکا شمدی امداددر !..



نم نارم اوندن ده مزداد در !!

کوزکیز اولورلر. يالکيز عبدالبعل قالور ومغاره دن  
چيقه رق قوليله - ساردانا پالک سرائى اشارت ايدرك ،

### عبدالبعل

شوبد بخته ديردك شه زن مزاج ؛

اولو ملرله طوغمش اوزى امتزاج !!

شه زن مزاجك باق آثارينه ؛

باق اجزاسنك شكل ايثارينه !!

بردن بره معكس حريق اولان كوزلري دونه رك خنجريله امانه اتجار برحالده ،

سمندر مى يم بن ؟ .. زباني مى يم ؟ ..

بونيران عصيانه باني مى يم ؟ ..

غروب ايتدى عشقم ، او حسن منير ؛

لهييمدن اولسون عدم مستنير !!

تم



## آثار مفیده کتبخانه سی

آثار مفیده منسوب اولادقلری ملتک سامان عرفاتی  
احتوا ایدن برر خزینه در . بونلرک ضیاعی، حیات اتمده  
تضمینی ناقابل ضرر لر ایقاع ایدر . بر طرفدن متوالی  
و مستولی حریرلر ، دیگر طرفدن قدر شناسان اجانبک  
بذل ایتدیکی نقود قارشیسنده اراده لری صار صلان و مغلوب  
اولان اصحاب و یا حفاظ کتبمزلک لاقیدی وجدان سوزی  
یادکار اسلافک بر قسمی کتبخانه فایه ، بر قسمی ده  
اوروپا و آمریقایه طاشیمقده در . اوایل بر حالد که کونک  
برنده خزائن عرفانمزلک بسبتون بوشاعمسندن قور قولور! ...  
کتب غیر مطبوعه مزک حال و مقدراتی بو . مطبوع  
اولانلرینه کلنجه : بونلر میاننده، مثلاً، مطبعة عامره ایله  
مصر بولاق مطبعة سنک و قتیله فوق العاده التزام دقت  
واعتنا ایدهرک طبع و تمثیل ایتمش اولدینی کتابلردن بر

## آثار مفیده کتبخانه سی

جو غنک الک قیستی و ذکر لیلینک نسخ موجوده سی  
آزاله آزله تدارکی کسب عسرت و، ینه مثلاً، براق سنه  
ول یکر می، اوتوز غروشله ممکن التدارک اولان بر  
بریم دیوانی بوکون یوز الی، ایکی یوز غروش راده سنه  
تر فیه فینات ایتشدیر.

مطبوعه دمره و مصر مطبعه سیله مطابع و طباع سائر دنک  
الی الابد حافظه آرای شکران اوله جق صورتده خدمت  
ایتمش اولقله برابر، انتخاب آثار خصوصنده دائماً اصابت  
ایده مامش اولدقلرینی آثار مطبوعه کوستریور. مثلاً  
شیخ الاسلام یحیی افندی کی لسان و ادبیات مزده  
ابیات معدوده دن اولان برذاتک دیوانی افعال اولنه رق،  
سنبیلزاده و سببی و عینی دیوانلری کی قیمت تالیه یی حائز  
اثر لر باصلمشدر. استانبول لهجه بیانک شعر مزده استاد  
اولی اولان باقی نک دیوانی بیله بواهمدن قور توله مدی.  
آلتمش، یتمش سنه اول طاش باصمه سیله وغایت نامطبوع  
صورتده طبع و تمثیل اولنان مجموعه اشعاری - که بوکون  
نایاب و یاکیلدر - بیوک مطبعه لر مرکز تفریق و انتخاب  
آمارده کی لاقیدیسی کوستر.

## آثار مفیده کتبخانه سی

اساسده کی بواطرادنمزلق اشکالدهده مشهود اولور :

مثلاً شاعر اعظم عبدالحق حامد بک شمدی به قدر انتشار ایش اولان یکر می بی متجاوز اثر لری مختلف کاغذ لر اوزرینه ، مختلف شکل وقطعه ده باصلدیغدن بونلردن اوچ، دوت دانه سنی بریده جمع وتجلیدایتمک قابل دکلدر . اساسندن پریشان قالمغه محکوم اولان آثار مطبوعه نك کتبخانه لرده نه قدر مدت پیدار اوله بیله چکی ایسه معلوم !.

معارف ناظری شکر می بک اقدی آثار

قدیمه بی ، متوالیاً تهیدید ایتکده اولان آفات ضیاعدن ومؤلفین جدیده بی ده طبع آئارده متمادیا مصادف اولمقده بولندقلری مشکلات وترددن وقایه وتخایص مقصدیله (آثار مفیده کتبخانه سی) هیئتنی تکمیل وبوهیئتک ریاستنی بالذات درعهده ایدرک وسائط موفقیتی احضار صورتیه وظیفه سنک امرایفاسنی تسهیل بیوز مشلردر . کړک بوکتاب، کړک بوندن بویه ساحه انتشاره چیقه جق آثار ، مساعی واقعه نك درجاتی کوستر .

هر تشبثک بدایتده بر چوق نواقص بولمق غیر منکر در . (آثار مفیده کتبخانه سی) هیئتنی آرزو اولنان مکملیتی

تمامیله تأمین ایده مدیکنی اعتراف ایدر . حرب عمومیدن  
متواله مضائب ومشکلاتک حشر ونشر اولدینی بر زمان  
ومکندهدها زیاده کمال کوسترمک آسان دکلدی . مع مافیه  
خصوات مساعیمزک بر فراز تکاملده قطع مسافات ایتمسینه  
مستمرآ چالیشه جغز . اللهدن توفیق دیلرز .

استانبول ، ۵ رمضان ۱۳۳۴

سایمان نطیف جناب شهاب الدین اسماعیل حقی

محمود کمال عثمان کمال













